

卷之二十四  
人物志  
卷之二十五  
人物志  
隱逸  
遷寓  
藝術


ル 5  
3258  
25





黃州府志卷之二十四

黃州府知府英 啟纂輯



人物志  
篤行

宋

黃岡縣

潘丙字彥明以解元舉進士與蘇軾善文而有行其弟原秀才  
軾稱為佳士工舉業見軾與朱康臣書  
董助教敦信義恤貧乏大觀閒歲大旱嘗為飯以待餓者又設  
資餌給小兒多所全活以壽終

明

黃州府志 卷之二十四 篤行

昭和十八年八月八日購求



黃岡縣

董經綸多隱德家頗饒好施與以義聲聞四方

孫子華陶以諒兩人皆輕財好施正統閒值歲祲各輸粟賑濟子華數千石以諒千餘石有司以聞上賜子華敕旌爲義民勞以羊酒免差役三年亦旌以諒之廬

朱文智字道全諸生與弟分財輒以多相讓嘗歸省江右饒虔吉信歲並荒慨然助賑正統成化閒輸穀凡三千有奇事聞特敕旌之勞以羊酒免本戶差徭五年

曾恕字希仁黃州衛指揮僉事性至孝父全正統時征橫江戰死嗣詔錄諸陣亡子姓恕後至人問之曰吾不忍也後督漕以介聞監司咸旌異之卒祀鄉賢

王孚生而穎秀童時與張寶共學於白鹿洞景泰癸酉同舉於鄉天順癸未會試孚弟美玉與偕值貢院災美玉踰牆負孚出復共入尋寶則頭面半毀又負其屍而出尋將骸骨南還孚後爲襄城教諭應河南鄉試聘有以賄求關節者叱之去襄城有尙書子違教令孚扑之尙書怒孚遂乞歸建書院於西阜山莊以來學者年七十餘卒

曹良輔字大忠居崎山陽釣於清溪號清溪居士以妻奩置產分諸兄弟族黨咸周給嘗有盜過其門曰是長者犯之不祥黃伯垓字鵬遠成化丙戌進士累官苑馬寺少卿節操清亮鄉評稱重厥後有余文瑞正德辛巳進士以學行稱卒祀鄉賢劉伯江宏治時歲大饑邑及麻城黃陂三縣尤甚伯江捐穀萬



石銀千兩全活甚眾

易大廈字廣居好施與嘉靖中出粟千餘石賑饑詔旌義民得冠帶後有史秉直諸生萬曆十六年邑大荒秉直捐米六百三十石煮粥於團風鎮以賑邑令給額獎之

邱尙忠事後母承順唯謹子岳在諫垣有聲尙忠偶謁縣令令疑有所請因問近得家書否卽應聲曰兒屬家書惟諄諄老夫慎勿造公府耳時稱其介卒祀鄉賢岳詳宦蹟

王秉直字子愚嘉靖乙酉舉人負性伉直生平無一字干有司所與游必賢豪長者非其類輒引去不交一談也

杜鳴陽字子鳳嘉靖癸卯舉人歷遂甯江川知縣有惠政故人朱廷相女許聘豪右迨廷相死且貧豪右背約女無所歸鳴

陽乃聘爲仲子傑婦其秋傑舉於鄉人以爲盛德之報卒祀鄉賢傑詳宦蹟

汪之渙字鳳溪隆慶庚午舉人萬曆戊子大饑捐穀拯濟穀盡自食菜羹甲戌公車道上見少婦自鬻贖夫罪與之金旣而其夫送婦以券至之渙曰吾哀汝貧豈有私乎焚券令歸卒祀鄉賢子世極詳孝友

王相字良弼諸生堂懸湛若水講學語以自警置義田贍族歲大饑施粥於路一日見婦人渡河爲鄉人所阻相乃以騎濟之因捐貲建橋後名王相橋知府潘允哲列名旌善亭相與鄭廷桂邱鳳鳴及從子養儀凡四人

鄭廷桂字石濱好施與有貸不能償者輒焚其券年八十餘卒



諸子廬於墓忽一人率妻子拜哭墓前問之則瞿姓也曰微翁之惠某無室今三子皆成立矣平生善行多類此子謙舉人雲南知府讜讚皆以文學稱

王同鼎字調甫廷瞻子以歲貢爲江甯知縣有廉聲性好施予歲饑弟同觀捐粟千石以賑同鼎亦力附之一郡多所全活方一盛字新字萬厯閒由儒士官四川鹽提舉持法平允商民賴之擢正定知府乞養歸事親以孝聞建祠宇置祭產又設粥賑饑掩路骼修橋梁凡濟人事不遺餘力年九十餘卒

孫顯祖字衡洞諸生喜賙恤貧乏有彭城塘歲獲魚利盡捐入宗祠供祭祀貧戚有遭喪者指他人田求售顯祖應之或言其詐乃曰吾聊爲麥舟贈耳還其田亦無德色以家事付二

子棲隱山林年八十卒子應鴻詳文苑

張鳳來字文字少孤事祖母以孝聞一門五世同爨嘗遊歷四方旅次遇盜喪其資斧獨友人所寄百餘金獲免仍還之封識宛然又拾道遺二百餘金還其主生平義舉多類此有司嘗旌其門曰長者里卒祀鄉賢子本忠詳孝友本恕詳忠義官如皋字直卿諸生家貧力學事親以孝稱母歿泣慕懇至處事恆以誠恕自勵或面折人過久之人以爲愛我尊曰古愚先生卒祀鄉賢子應震詳宦蹟

劉文元歲貢生華容教諭性方正有故人王追美臨終以幼子一鳴爲託元許諾不率教則扑之又平率則捧追美木主跪一鳴而泣諭之一鳴鄉薦後謁文元衣履偶未肅輒怒叱不



稍假一鳴卒成名進士

徐崇德字象賢貢生賦性坦直以禮經名四方士多游其門官

白水教諭風節特著卒祀鄉賢

徐禮字天佑有隱德兄早卒子幼撫育教訓俾至成立里中有

不能葬者助之無德色

王志隱 逸移入

阮文蔚字自質萬曆己丑進士生平介潔嘗道經維揚離買奉

千金屬居閒文蔚曰吾先世無千金產况敢侵士大夫權竟

卻之後官行人卒時貧無以斂巡按李天麟為經紀其喪

萬一儁字葆初嘗避賊鄂城有河南人李姓者士人也亦以亂

奉母至賊圍城備縋而出復入求得李與俱出乃行又避亂

崎山路遇賊劫其帑已知為儁也謝而歸之從兄一奇嘗曰

吾弟渾厚如太古他日遠大吾不及也子四俱以名德重於

時爾昌爾昇詳隱逸

曹之建字中甫士彥子歲貢事繼母蕭以孝稱戚族貧者婚葬

皆助之由吳江教諭擢四會知縣有清直聲孫本榮詳儒林

何讓字韋長弟謙字緘仲兄弟皆博學尚氣誼人有一善力為

表揚與廣濟劉養微善養微病供其器用服食絡繹不絕養

微沒走三百里經紀其喪并為刻康谷子集讓子元方篤行

能文以諸生終著有元方遺集廣濟劉醇驥序以行世

何直字報所幼聘同郡鄧氏女女年十三目眇足廢鄧翁謝請

他聘直不可竟娶之後鄧卒遂不再娶父母卒日必省墓歸

則扁坐一室以詩文自娛子閔中詳宦蹟

三楚文 獻錄



樊玉衢字荆軒少從父煒司訓漢陽會張緒講學江漢玉衢與兄玉衝師事之侍父疾衣不解帶者三年比卒哀毀骨立兄玉衝早卒事寡嫂如母又置義田贍族立義倉以備凶荒見善輒行不遺餘力卒祀鄉賢子維域詳文苑

葉國章字憲可事繼母孝崇禎癸酉舉人授徐聞知縣以疾歸平生好行德義全活甚眾有鄉人來全者以已女償人債章爲贖歸又嘗借蘇州陳楊二人金百餘兩值兵亂無可歸乃分濟饑人書其上曰某氏之金使歸美於陳楊也

杜鈺字子堅諸生習父時芳訓言動不苟有夏姓者垂老爲豪右債窟鬻其子鈺爲贖之後與弟鏞同舟鏞溺鈺赴救並沒於江詩文甚有稱著有子堅遺稿同里杜濬爲之序

義僕

附

華魁叟邱高奎僕也明末兵亂高奎年甫十二爲賊擄魁叟奮身入賊中七年乃尋得之邱氏數世子傳至是得不絕旣歸延師訓之補諸生爲明經高奎卒有幼子四魁叟復撫之成立前後事其主五代年百有一歲

胡義勤杜芥僕也性樸拙喜聽人言忠孝節義事其父以震死遂終身不娶崇禎甲申之變芥與兄濬盡室居金陵僮僕輩爭趨勢要且約義勤同去義勤曰吾命薄願與主人同飢寒泊芥歸沒義勤號哭嘔血得喘嗽疾明年復之金陵依濬濬憐其老病善視之年五十五卒濬瘞於松江西門外福菴後并銘其墓



蕪水縣

陳遵德正統六年陝西饑捐穀五百石往賑中途為難民所奪復載六百石以往有司上其事敕旌義民勞以羊酒給復三年

徐朝仕正統間陝西饑出千金穀千二百石助賑賜敕嘉獎

南鑑榮景泰六年知縣何實立集義倉鑑榮捐穀五百石助賑

成化二年邑大饑復賑穀千石當事賢之禮賓鄉飲

蔡時成化時出粟五百石賑濟授承仕郎

胡溥字景周少勵行好學以嚴謹為閩閩師教二子仲謨仲誥

皆成進士仲謨詳宦蹟

王承芳然諾不欺延江西鄒生為師鄒積數年館金託承芳經

營後鄒歸承芳疾不起乃以匣儲金子母登記封置牀頭囑家人俟鄒來予之子希元詳宦蹟

南邦取字賓吾慎言笑嚴取子居常與人無競至義氣所激則凜乎如烈日嚴霜不少屈焉教子敦行力學皆知名子三有臺進士戶部郎中有杞諸生性厚重以孝友稱卒祀鄉賢

高如岳字鎮南博學強記入南監為祭酒郭明龍所器重就新津推官楊一鵬嫉之不為屈遷靈川衛經歷投劾歸事母孝養無缺置義莊三十畝以贍族人年饑煮粥多所存活子宏基詳宦蹟耀基詳文苑

朱廷錫字善吾年十二通周易聲名藉甚比長問字者填門歲入館脩與弟共之萬曆間三中副榜知縣游王廷舉鄉飲禮



造廬敦請年八十二臨卒招一寄金者至手付之而瞑祀鄉賢

徐三餘三仕一唯孫俱諸生英年有才學值明季亂散家貲數千徧給貧苦惟擁殘書教子弟為實踐之學遠近師事之三餘孫五宗詳宦蹟

麻城縣

夏子文正統六年春大荒詔民間出穀賑饑文捐米千餘石敕封奉訓大夫建坊

萬祥字河東成化辛卯舉人授蘇州推官舉卓異士民請留陞本府同知丁艱歸遂絕意仕進授徒西塾學者稱河東先生縣址瀕河春夏患衝激祥捐貲疏上流為新河以殺水勢至

今賴之祀鄉賢

李文欽字天存文祥弟宏治戊午舉人任南陽通判以母老乞養不許遷陝州知州未幾棄官歸養母卒哀毀骨立居鄉質直見人言不順正色責之其風概不愧父兄卒祀鄉賢

梅汝觀吉子有隱德生平不談人過失待同宗親戚無不加厚教子孫均為名人卒祀鄉賢子國楨詳宦蹟

劉守泰隆慶辛未進士授吏部主事父瀾與張居正同年或謂可援以入中祕不從轉考功司值計典人莫敢干以私卒祀鄉賢

周應嵩字子中宏祖子萬厯己丑進士磊落不羈好施與父沒以所市產還其主者無算一日置數十金於篋為同塾友盜



去家僮私啟其緘金在焉嵩命緘之終身不言授南京國子監博士踰月得疾歸卒子振詳隱逸

喻儀字麟野諸生以邑不通舟楫漕糧運兌甚爲民苦萬曆二十四年呈請當事奏准永改折色邑人推爲義士卒祀鄉賢田可東字季川尙義好施有故人密寄千金旋卒逾十餘年其子成立東送還之封識如故

鮑時發諸生好施與歲歉散貲財爲粥賑饑三年不倦年六旬焚僕券歸其財產人多頌之

胡公國字爾定崇禎庚午舉人多義舉值土寇猖獗建拜郊堡保全數萬人監紀道賈同春縱兵剽掠公國躬詣經略盧象昇陳訴兵始輯同時周楷字若庸諸生變家產建砦梅侯山

屢卻賊復以計擒賊目張靖徐槐等巡撫宋一鶴親臨驗功

移咨禮部授河南商城教諭公國子躍龍詳宦蹟

蔡之瀾諸生與知府許文岐爲世交文岐陞下江防道駐蘄州獻賊陷城被執不屈死之瀾聞變冒死入賊中背屍殮之親送至文岐家鳴於巡按後以殉難得請賜祭葬

黃安縣

邱文本姓盧字靜軒正統間河南鄭州大祿文出穀一千一百石負擔往賑之有司上其狀旌爲義民仍免本戶雜派差徭三年

阮昇字光也多積粟每實粟一倉必識其上曰命倉妻杜勤紡織亦以其餘易豆麥儲之遇重賈不市正統五六年歲洊饑



黃岡麻城黃陂之民逃亡殆盡昇乃盡出所積設賑招之散者以聚一日昇忽有憂色徐歎曰舊穀盡矣新穀未登乏三日食奈饑人何杜曰是奚足憂吾之豆麥詎不足支三日乎昇大喜立舉以賑存活無算撫軍聞之引當時民謠阮昇積下萬年糧三邑饑民活命長之句以聞廷議授之職辭不就

隱逸終身

據張希良義士述補

耿大振字鳴甫持身閑家一秉於禮遇子姓嚴峻內外肅然妻李氏沒不再娶終日危坐觀書史不樂與俗人接惟儒冠至則劇談不倦年七十一卒子金自有傳

耿金號靜菴廉介仁厚里有劉某與逸盜同名令捕之時長子定向為諸生金使往白其誣劉奉金帛謝不受家婢樵鄰壤

鄰子毆之越日暴死金召鄰叟慰之曰吾婢實以病死吾不訟也定向巡西夏債帥持千金求薦金叱遣之初定向與弟定力鄉會捷報至漠然不為動後定向謫橫州判金一喙而已無愠色年八十四卒祀鄉賢子定向定力定理俱詳儒林程自重字任甫歲貢生好學不倦初任安陸教諭其故人將為致書上官求右轉重謝卻之適攝縣事掾請執法重曰同鄉無執法例某但護印耳悉留以俟來者終辰州府教授張榮明嘉靖六年販穀至江西值上饒縣歲饑盡捨以賑濟存活無算地方官上其事旌表建坊

張廷舉字懷溪萬曆十七年邑大饑闔族苦徭役越境避之舉毅然以身任逋賦值徵比期賠累甚鉅以是家益落而前此



借貸者悉不責償子鵬翔自有傳

汪世洪字小溪積德好施里中某以貧鬻身洪出五十金代贖之萬曆初歲旱荒出穀五百石以贍鄉里知縣孫振芳表其門

秦儀鳳字應泰存心濟物有友人家病疫人莫敢近儀獨旦夕往視躬殯其母居恆教子弟以孝友家庭雍睦宗族化之

秦如容字介臣諸生家貧刻苦讀書尤敦孝行崇禎甲戌成進士選中書念邑人計偕北上無停驂所爲倡建會館又置義塾以教宗族子弟著有雪浪篇問有山房諸集卒祀鄉賢

吳光乾字彥清歲貢生襟懷灑落與何閔中王一翥善任四川金堂教諭學使使閱試卷有富室子賄之不受已而從糊名

中得之富室齎金謝乾曰吾豈掩人以取利哉仍不受擢蘆山知縣不樂仕進棄官歸

程之渾字內昭繼善長子善屬文崇禎己卯副榜官淮安知府以世亂挂冠歸里居恂恂退讓有園田數百畝奴僕十數人悉與羣從共之

鄭稚橋重然諾有人寓居於安一見投契其人後爲青州守值世亂留宦囊及二妾託稚橋無何安亦亂稚橋急詢二妾母族一在杭州一在揚州乃買舟南下親送至揚適其人調任別郡舟次相遇泣謝之約偕往稚橋固辭歸

張鵬翔字拱北廷舉子諸生嗜學博聞有隱德崇禎十六年邑令舉鄉飲大賓不赴次年復強之爲書懇辭先是里有黨



人之變翔率仲子百程會眾勦之亂乃定好事者蔓誅不已  
翔流涕爲言殺降不祥多所全活晚講尚書於璧山學者稱  
璧山先生著有璧山文集卒祀鄉賢百程詳忠義

羅田縣

余叢歲貢生順父母篤同氣博涉古籍不尚浮華成就後學甚  
眾學者稱迎山先生卒祀鄉賢

胡漸歲貢生博通經史言行不苟後學多宗之嘗與張居正友  
善張貴屢招不至時稱其介

胡效義貢生豐縣主簿友愛昆弟尤樂施與嘗捐貲倡建邑中  
文昌閣萬魁塔他如施粥施棺木修橋修路善舉甚多鄉里  
咸稱其德

胡明性恂謹好義尤篤天倫家庭雍睦人皆羨之訓誨諸弟均  
以學行名於時弟明睿詳孝友明通詳儒林

徐重謙少孤貧母童氏苦節教以力學遂潛心經史閉戶著述  
敦品自好從游皆名下士知縣李雨霑李成紀咸敬禮之子  
熙明詳宦蹟

蘄州

顧禧正統中大饑賑穀一千二百石事聞勞以羊酒命有司立  
旌善坊

王泰字德溫方正不阿人有貸不能償者輒焚其券子翰敷歷  
中外骨鯁有父風詳宦蹟

陳詠字叔雅以貢任四川萬縣訓導工文善書言動以禮一介



不苟取年八十卒貧甚門人贖之乃葬

胡從瀾與弟從滿從渾世居蘇家山五代不析箸止德中載穀千石至省城值饑盡捐以賑事聞敕旌

李樸字滄夫正德丙子舉人官隴州知州以直見忤調任不赴遂歸著有存笥稿詩文集卒祀鄉賢

張維字養初萬曆歲貢生任學官危冠博帶言笑不苟荆定王爲世子時尊禮爲師及嗣封延教懿昭世子州人士以經術顯者多出其門

史朝貞號介臺萬曆戊子舉人官同知負性剛直與人接言色不苟歸田後時事有不便者正議爭之鄉里咸倚賴當道亦敬重焉

孔庭訓字聞卿諸生少負雋才篤氣謹惡甚嚴落落寡合李

侍郎盛春副使際春獨器重之命子姪奉爲師

陳信號恂齋持躬謹飭雖獨處無跛倚容弟書年十八爲諸生窮經至嘔血不輟兄弟學行爲時所重

李建木字泰階時珍季子少爲名諸生性澹泊耽書史嘗拾金

於路移日不去待其人還之親戚假貸不能償者輒焚其券

亦不與人言萬曆三十六年大水孳死載道建木爲粥以食

全活數百人卒祀鄉賢嗣子樹初詳忠義節錄白茅堂集

陳其瑜字拱珍存心仁厚嘗出數百金修渴口鎮石路人免泥

溜之苦貧死者施棺斂之又捐河西地十餘畝爲義冢明季

死於賊



廣濟縣

張本森字木齋遊學齊魯閒授徒三年積館穀數十金值歲饑悉以賑貸貧民赤手歸與婦相向怡如也後子孫鼎盛

吳仲美字原溪正統四年邑大祲美輸賑穀一千八百石活人甚眾事聞旌義民賜冠帶後成化閒復捐穀一千二百石以

周貧乏子守坦有父風亦以救饑受旌

藍懋忠正統四年出粟一千五百石賑饑救旌其門寵以冠帶

羊酒從子瓏成化時復為闔邑代輸春租

程孔良游校毛思甯鄭德廣徐伯安梅桁桂希堂成化閒俱輸

穀賑饑

彭幅縣志作幅宏治二年出穀賑饑事聞旌以冠帶

程友悌劉禹清戴子檢縣志作子儉徐萬貴程紹宗王應中李正芳

劉璜饒仲魁呂用賢宏治閒俱輸粟賑饑事聞旌以冠帶

胡繼矩字成方父萬金有隱德繼矩嘉靖歲貢生孝感訓導時

心學盛行繼矩厲禁之士無染其習者廩祿所入悉寄歸營

家廟表先塋贍族黨自奉清苦寒素所不堪撫治王世貞薦

於朝以翰林院待詔徵尋卒子其大拔貢禹州學正有父風

胡應中字廷道隆慶四年中茂才科內修端潔好行善事嘗置

義田以贍宗族年饑捐貲濟人有貸不償往往焚其券構涇

瑩書屋招聚四方名賢講學因使其子從之游著有語錄學

者稱教菴先生子士定詳忠義士容詳宦蹟居業齋集

陳王道字仁輔萬曆癸酉舉人學宗陽明聞羅汝芳闡道盱江



往質其門學益進嘗欲仿行范仲淹義田朱子社倉法時廣濟苦漕運張居正為相王道與劉天衢請改折色獲允其半後人賴之卒祀鄉賢從孫文濤詳文苑

藍孟文萬曆三十六年水災賑穀六百石又為本族代輸秋糧

陳叔牧縣志作淑牧萬曆間代闔族輸租千石

徐萬隆居心忠厚有黃梅里役解餉數百金投宿因醉遺於廁隆拾歸徧訪其人還之事聞旌其義

王友立嘗得橐金於舊河口求亡者不得以告於官則某里役領解之三百金也令義而旌之

饒嘉班字季雅諸生好周人之急施棺至猝不能備鋸庭前大枋以益之晚讓宅於兩兄自處數椽淡如也

李調元與弟數倩以衛籍運漕艘邑黃義仲附舟北行染惡疾

不可近李為進藥餌湯醢數取衣澤澣濯之經數千里不輟

黃死為歸其櫬費數百金無德色友人龔哲以兵亂死鄒國昌以疫疾死皆為置棺具殯之

張金璣字涵珍饒於財萬曆三十六年水災輸粟活饑民甚眾崇禎初歲苦旱人相劫奪璣亦被劫邑令拘究反為辨而寬

之崇禎十三年荒疫代輸闔圖南糧三百戶獻賊之亂殘骸徧野親提筐篋收瘞焉年八十四卒

黃梅縣

石銓陶文達正統時出穀賑饑銓捐穀六千四百石文達捐穀二千五百石事聞賜坊旌為義民勞以羊酒免本戶雜派差



役三年銓祀鄉賢

黃仲懋正統時歲饑出粟二千五百石助賑旌義官平生於津

梁祠祀無不助修

張士美

縣志作士義

正統時罄家財救旱災事聞給冠帶

魏澄成化丁酉舉人行履端潔嘗為人雪沈冤謝以金卻不受

居鄉授徒貧者不取贄

余壘字天瑞家頗饒而好施與遇同里饑寒輒分給有貸而不

能償者取券焚之宏治中大饑壘捐穀千石邑令將以上聞

壘辭曰吾以恤鄉鄰也敢要名哉邑人名其里曰瞿曇嶺通志

沈澹素行清介正德歲貢生官長洲縣丞夙與蘄州馮天馭交

密後天馭督學江南按臨長洲同閱長洲卷人不敢干以私

王夢篆字珍文萬曆癸卯舉人沈酣典籍由靖安知縣遷平樂

通判清苦自甘行李惟圖書數卷歸田後葬族喪之無主者

十一棺修祖墓使闔族知所世守年八十卒

國朝

黃岡縣

陳天生字植其父楚安生母劉俱早逝事嫡母蕭至孝弱冠補

諸生敦行尚義至老彌篤葛巾芒屨逍遙遊詠有古隱君子

風卒祀鄉賢子五長肇昌詳宦蹟

鄧錦字子燦本姓曹順治丙戌舉人歷官兵部主事出判彰德

府解組後沈酣圖史被服若儒素端方誠篤里中稱為長者

杜琦字奇玉伸孫警敏力學事母以孝聞順治甲午舉於鄉授



黔陽教諭日集諸生講禮法程文藝士風不振子士默字伯  
緘倜儻好義由選貢教諭大冶值歲饑民譁士默諭之輒斂  
息故人索震老無子知縣汪灝子壻貧不得歸士默并資給  
之終其身無德色

蔡師孔諸生居濱大河嘗捐造義船置田數十畝爲修理費又  
置族祠義學並白雲寺香火田各數十畝子之騏諸生亦好  
施有旗丁逋官糧之騏捐穀三百石銀二百兩贖其死者七  
人後鄉飲聘爲大賓

韋克繼字承公歲貢生和厚樂善從弟妹之孤子皆爲婚嫁又  
故人避仇遠遯遺子方數歲克繼育之三十餘年學成有室  
其父始見焉克繼招之歸也年七十餘卒

易中瑜字與偕諸生家貧尙義族有幼稚貧而爲僧者贖歸爲  
之撫養授室其妻弟出繼他姓亦收養之嘗拾遺金歸其主  
龔鼎鍵字夏彝十歲能屬文以歲貢選訓導未赴任卒孝友敦  
厚里黨號爲正氣先生弟錫恩諸生輕財好義從子陳謨善  
處兄弟亦以義稱

陳維藩字爾碩康熙十年饑賑穀四千石次年再饑爲粥於路  
以食餓者存活甚眾布政使徐惺知府于成龍給匾旌之年  
九十八卒

周之鳳字爾尊康熙十四年歲饑捐穀千餘石以賑知府于成  
龍給匾旌之

胡可封諸生康熙十八年歲饑捐穀五百石又勸捐千餘石活



人甚眾知府王輔親至其家旌以額

張美之市民也尚節義少時遭流寇身被數創走伏荻林中見女子言自江陵避亂迷路不得歸美之引歸其家禮視唯謹歲餘亂平訪於江陵果得其父壻迎之歸美之壽九十餘

杜大任字連玉歲貢生雲夢訓導性孝友鄉飲升賓坐知府李彥瑄知其賢有加禮嘗講學於城南草堂遇貧士助薪粟多所成就子啓運進士西和知縣以廉幹稱

靖乃質字素菴諸生留心經濟康熙甲寅乙卯閒連歲旱荒質捐穀爲鄉里倡全活甚眾知府于成龍獎異之又嘗捐千金爲宗族建祠修譜族蕃星散質年幾七十所至詢訪不憚勞瘁鄉族稱焉

周有堂字叔蔭少孤事諸兄敬愛備至家貧力學康熙壬辰成進士授中書舍人雍正丙午典試浙江稱得人補禮部主事遷吏部以疾歸仕宦二十餘年貧如故

周世達字道以監生能文章尤敬禮賢士見貧乏輒賙之鄉里賴以舉火者甚眾家以是落不恤也子八人多能文者茂建詳文苑

方可丹字一常雍正癸卯進士授新淦知縣有廉平稱以病改辰州教授訓士先行後文丁艱歸閉戶不出知府禹殿鼇重其爲人延主講河東書院多士景從後以方正舉選襄陽教授卒

孫天祿字亦焯歲貢生少失怙恃事祖母以孝稱喜讀書尤敦



行誼邑有貧鬻其女者訪知為故家後乃擇從子年相若者昏之人以為義晚授當陽訓導因疾乞歸

萬紳祖字純子性孝友父病求醫一日夜行二百餘里及卒殮殯皆如禮歲時館穀悉付兄弟無所私嘗急父執之難崎嶇齊豫潁泗間雖危迫不忍去又嘗值歲暮貧金償私逋途遇被誣者告以困即傾囊予之子年茂詳儒林

王如海樂施予凡修橋梁設義渡施棺槨皆不惜重貲大吏以好善樂施旌之并為請建坊子宗華克承先志捐田百餘畝於問津書院又捐七百餘畝於賓賢館百餘畝於蘄水興賢莊 京師黃岡會館黃州試院鄉試貢院皆增修而繕葺之前後費金錢以十萬計巡撫高杞上其義行議敘鹽課司提

舉弟啟麟宗茗議敘州判

參通志

徐璋字襄邨乾隆己酉副榜敦品勵學家無僭石吟詠自適精岐黃術無遠近皆應其請道光八年選應山教諭未任卒從姪夢麟字再陵 恩貢生亦食貧力學性孝友奉嗣母夏及本生父母生事葬祭悉如禮兄弟無恆業麟以筆耕同甘苦授徒數十載成就者多有嚼梅書屋文稿

孫承則字南溪性方嚴言動不苟讀書以先正自勵而尤服膺同邑杜茶村嘗註釋變雅堂集室內設茶村位每晨起盥手焚香然後展卷遇茶村生日必採四方名茶供之平生負經世志於防江治河選將練兵諸事多所論撰後因次子宏任抱才蚤逝遂絕意仕進徜徉山水以終著有春泉亭集



許希曾字省齋議叙鹽知事祖母殷母李俱以苦節 茲詳列  
女傳希曾幼逮事曾祖職員景道恪遵祖訓以孝稱性樂施  
予族多貧乏歲時均有周給宗祠圯力謀新之道光十一年  
大水民艱食平糶倉穀里中貧不能償者代償無德色復捐  
錢粟助賑全活者眾

范紳字朝典家素封勇於為義里中有鬻婦者予以金婦得留  
嘗修橋以便行人助河東書院膏火以勸多士每歲春夏閒  
貧民乏食多方賑貸先後費穀二千餘石咸豐九年巡撫胡  
林翼請於

朝得建坊子四廉斌欽鈺斌字廷士布政司經歷持躬儉約而施  
與不吝道光辛卯辛丑歲游饑倡捐施粥存活無算族鄰有

故力為排解遇緩急必傾囊濟之巡道劉肇紳知府徐上鏞  
知縣王令儀各旌以額欽詳孝友

樊蔭南字波亭貢生事父母以孝稱少嗜學與邑人王鑾為文  
字交生平慷慨敦風誼里有前明名宦葉夢陽墓坍塌久不  
治蔭南為封築作文表其阡咸豐初先人孝介先生祠就圯  
蔭南出重貲修復旋毀於兵燹復捐建之並置祭田供祀事  
其見義勇為多類此卒年九十四子純藻貢生善繼親志咸  
豐三年歲祲以父命出穀四百餘石賑饑又捐建沙河頭橋  
行旅稱便

徐佐文布政司理問銜生平多義舉嘗修問津書院又修鵬溝  
石橋曾家河橋行人便之每歲暮於負逋不能償者輒焚其



券里中有牙角爭必多方排解雖傾囊不惜也

徐懋元字文菴懋修字心齋俱監生皆仗義疎財道光辛卯壬辰水災懋元糶穀數千石減價十之五辛丑歲饑捐穀三百石全活甚眾懋修值道光己酉水澇糶穀二千石減價十之二咸豐丙辰大旱捐米百餘石為粥賑饑懋修卒年九十六萬鼎券字蕙貽道光己亥舉人家貧授徒每歲脩金分潤諸伯叔歲庚戌館保定適同邑舉人奚德灃亦就幕畿輔以病卒鼎券竭力治其喪復賻金為倡歸其櫬生平喜誘掖後進多所成就卒後選鶴峯訓導

嚴耀京字高峯性伉直樂施與姪光訓棄儒服賈為追逋者所迫耀京鬻產代償之自是家漸落有勸其索償者辭曰既與

之復索之是益人之貧以濟己也終不問年六十七卒

邵際模號吉菴幼聰慧九歲能屬文家貧失怙年十六即授徒養母卒能自成就列門下者多通顯生平尺規寸矩為里黨矜式凡事涉爭訟必竭力排解踵謝則屏不一見子樂裕泮遊後猶勤勤督課得通籍成進士人咸謂食報不爽云

胡國安字六平從九品同居百餘人和睦無閒言與朋友有肝膽尤敬禮寒畯咸豐四年賊至國安慷慨集團毀家紓難安麻兩邑人士均倚重之

馬先甲先福異母兄弟也先甲生甫週母劉卒事繼母朱孝敬備至與弟先福友愛逾同母兄弟均性樂施予同治甲子之難閭里凋敝出粟數百石周卹之他如施棺藥修橋梁諸義



舉皆竭力以應不稍倦卒年各七十餘

萬裕青號選亭諸生潛心理學務實踐事嗣父以孝聞咸豐四年有鄰村某導髮賊毀其家及鄉團立或勸青究治置不校某感悔請賠償力卻之年八十四卒

程澍森諸生行誼純篤咸豐十年由儒學申報好學篤行義士巡撫胡林翼獎以古之良士額 奏請建坊

張煥清字玉階世重儒術煥清益折節讀書承先志喜推解咸豐間粵氛熾甚煥清捐重貲練勇從知縣葛致遠勦賊不避艱苦巡撫胡林翼以義士額獎之

王元定字長卿家貧嗜學通經籍能文及門成就甚眾年四十二不遇遂寄情山水忘懷得失以終

單開第字乙峯道光丁酉拔貢性孝友族黨無閒言讀書慕古人行事遇義舉尤樂爲同邑舉人廖志基交最久廖無子貧病且死以其妻爲託第倡義釀金月權子母俾薪米無缺乏終其身第復經紀其喪春秋省廖墓歷久不廢人咸稱盛德焉卒年八十一

方鏞號笙甫念宗子道光癸卯優貢幼失怙恃育於兄嫂嫂年八十餘鏞母事之初屢試優等文名震一時知府楊福祺延爲子師課讀外無一語及他事咸豐間膺巡撫胡林翼聘襄辦善後事宜胡來函稱其孝友於家名利澹然當時以爲確論退歸後教授生徒著述自娛鏞爲人如太和元氣而操履甚端詩有唐音書法倣褚河南畫蘭尤臻逸品先就訓導職



繼保教諭加鹽提舉銜年七十五卒著有笙甫詩草

殷必達別號石田老人諸生食貧績學性嗜酒讀罷輒飲咸豐初粵逆踞黃將陷以偽職必達託大醉佯狂以免已而逃之小岐山寺呼二子昇竹榻坐白雲古松閒飲酒自適同里諸生劉澤字春如守正不阿而性亦坦率兩人皆隱居教授終盧鴻熙字六于諸生事親孝父歿廬墓甫數月賊至號泣不忍去家人強避之賊去仍守墓日夜追思肖像奉之如生前性方嚴日書功過格又著勸善書數萬言里有溺女習每覘知給湯餅錢二千逾月勸人取爲養媳復立藉援堂募善士集貲繼之同治元年舉孝廉方正

羅殿俊字傑夫輕財重義咸豐六年河南正陽大饑酒匠某將

鬻妻給金賙之有游姓鬻女俊家女之姑母謀贖還卽遣之不索值嘗過光山遇二小兒乞食詢悉一家流離相繼物故惻然收養數年送歸籍

龍逢洙字積齋性謹厚樂於爲善玉帶橋圯洙捐貲修補遇貧乏者尤竭力扶助前知府黃益杰撰幾輩效廉公謙約平生無得失毀譽十四言獎之可想見其概云

劉熊興字欣園慷慨好義戚友以緩急告必應及子維楨貴善行尤著如營建祖祠昭忠祠置祭產義田義塾義局善堂社倉三台河橋渡皆令其子次第舉辦又於京師岡邑會館江夏勺庭高觀兩書院暨郡城河東書院賓興館卷價孤貧口糧以及赤壁黃鶴樓洪山塔廟三泉亭長亭諸名蹟各捐



黃州府志卷之二十四  
賁助之而直晉兩省大荒先後捐賑尤鉅奉

旨旌表建坊著有碧雲山館詩集

徐鍾衡原名中和字南山縣丞銜事親孝與弟友愛無閒言生平見義勇爲不避勞瘁同治初首謁當事綜核縣屬團練捐貲銀數稟請奏廣文武學額所需經費悉竭力籌畫以底於成邑人士交稱之

蘄水縣

桂大生字元直諸生特立獨行不求聞達詩文書畫名重一時華亭董尙書其昌深加器重學者稱爲貞介先生

楊繼柱字文升諸生居家孝友人無閒言性好士凡楚中知名者多延於館供其困乏人以緩急告無不應之著有周易辨

疑三傳從同等書

范璿字睿玉諸生好施與嘗捐軍田二十八石以厚族人又捐崇義倉社穀百餘石鄉里賴之子同仁字純希監生性寬厚閭里有鬻子者同仁爲贖還鞠育長而遣之有某鬻身於同仁察知爲葬父故立還其券孫思皇詳宦蹟

張師聖字念尼廩生讀書尊經術言動悉有準繩嘗捐金救水災歲歉復捐穀助賑買僕知爲良家子焚券不責償更予金以資其生理子旭榆亦多義舉大吏兩錫額獎之

徐允福字巖公諸生幼孤事繼母以孝聞喜扶掖後進有貧不能卒業者多方以成其材族子某因貧鬻身允福捐鏹贖之外姻某孤貧給田二十石道拾遺金二百兩封還失者無德



色子四泌志遠克紹先志屢修橋設渡費數千金弗吝也

王夢鯉字龍友諸生存心剛直見義勇為邑苦里長役多流離  
蕩析者夢鯉率眾請於當事輾轉三年至康熙乙丑始獲革  
除時同邑諸生張鳳起捐貲三百金助夢鯉請民困獲紓兩  
人力也夢鯉子六人俱列鬻序季國英詳宦蹟

鄭崑璜字汝堅從邑名士徐子芳受學為諸生安貧樂道家巴  
河鬻市也非以文字質者終身罕得見其面每往還館舍必  
取徑後山不履市廛年七十四卒

周多才字以謙歲貢生自少至老篤學不倦於聖賢道義能深  
思自得而確守之雖衾影急遽之地不失所秉持蘄黃後進  
有文行者多出其門

官正德字咸一純滋子廩生少失怙友愛羣從奉孀母三十餘  
年備極孝養營葬祖墓悉出私橐見人過失直指無隱有以

非禮至者若虛舟之觸焉文辭高古至老不懈於學  
袁明甫字一耀有某因責負急將鬻其養媳者明甫為捐金償

之康熙三十二年大早飯饑餓於道彌月弗怠郡守戴特獎  
以額子引吉亦歲施棉衣膏藥捐修彭家港路置義冢於黃  
草湖畔妻李氏施棺木百二十餘具蓋一門均好義云

張世名好善樂施康熙閒邑早捐米周給貧乏邑有盡街橋久  
圯世名捐貲重建知縣李振宗為易名生生橋並為之記有  
遠客某死無歸世名葬之祖墓旁子度孫睿俱諸生蒸蒸慕  
義克繼前志



潘秉禮字鐸士增生敦品力學鄉里有鬪者望其顏色輒驚走  
隨事訓人皆爲所化里有栗木橋通衢也歲久欲傾議修之  
而未逮臨終命其子伊超出五百金成其事孫紹經詳文苑  
紹觀詳宦蹟

陳連字孚交諸生孝友端謹不輕入城市訓子弟以修身立品  
爲務家法嚴整族鄰有因貧廢讀及困乏者必資助之孫士  
珂自有傳

葉方雲字從龍孝友和平慷慨好施蘭鎮居浣河下流前江後  
湖地勢低下雲捐金數百自街後至彭家港約五里許均修  
石路行人便之

陳天錫生平多義舉邑巴河口河道淤塞每久雨積水害稼天

錫捐近河地數十畝開溝引水西流民獲其利知縣汪旌以  
額

李光浩主簿銜好施與窮冬袖金入城遇婦人攜兒哭甚哀詢  
之乃爲夫所鬻以償債者浩出金與之夫婦母子獲全夜有  
盜攫其貲既覺以財勸其改行盜感悟偶過屠肆見一牛  
將就縛浩以重價贖歸同邑劉夢鵬嘗贈詩美之

范觀瀾諸生嘗館中州有羅邑王某因歲歉鬻其子爲奴瀾詢  
知捐館穀爲贖歸又館英邑拾遺金三十兩急榜通衢訪得  
其人還之

陳士珂連孫乾隆丁酉舉人性端重言動悉遵禮法以引誘後  
進爲己任與同年生徐家鷺相友善鄉里有陳徐二君子之



目子光詔詳宦蹟

徐家鷺字蘆村乾隆丁酉舉人北上時遇一人徒步行甚艱問之王姓煥名河南汝州籍亦就試禮部者鷺惻然引與共輿王既成進士令蘄水下車踵門修謁鷺一往答拜不再至其署王曰徐子殆超於澹臺氏乎他日鷺宅被盜王差捕甚急鷺使其子止之後選歸州學正以病不赴

陳學位字素庵歲貢生能文章重氣節貧無立錫地志操益堅列門牆者皆敦品誼不隨流俗

司先格號覺軒嘉慶丙子舉人鄖縣教諭事父母以孝聞訓子授徒必以實學有姊適易姓貧而寡分財養贍成其節解綬歸主講蘄陽書院士類悉荷甄陶年八十一卒

周鼎字理齋嘉慶戊寅舉人家貧力學居鄰闔闔足跡不出戶庭歲歉有鬻妻者鼎捐館金贖之後任孝感教諭

徐奉詒字奎門道光甲午舉人淹博書史卓有文名五上春官四薦不第遂閉戶著書後進多所造就尤謹持風節非公事不入吏庭知縣王慶雲獎以品行端方額時論服之

畢蘊珩布政司理問銜好善樂施道光間建橋易家河口以便來往又施棺木千餘具每具另給錢五百文米一斗同時畢際德際遠兄弟亦修橋路施棺粥以好義稱

徐奉誥諸生輕財重義族有鬻獨子爲僧者誥爲贖還復助之金娶妻生子得縣宗祧弟奉策諸生亦好施道光二十一年冬大雪月餘人多凍餒策典衣得百金易米分給之



高琨字年茂監生慷慨好施捐陳家廟河渡田十石子樹華字  
玉生捐公車田六十一石成誼田六十石又捐義莊田二百  
石以贍族之貧者邑中一切公舉輸助不吝孫錫恩銘恩捐  
卷價並興賢莊田課百石

李之翰諸生篤學勵行性謹厚足不履蟲蟻每出必以布袋盛  
錢遇殘廢者輒與之歲寒備棉衣給凍者朔望誦文昌格言  
數十徧夜聞雷必起整襟危坐年踰古稀端坐而逝

何汝梅字燮臣歲貢生性公直里中有牙角爭排解立服同治  
閒髮捻猖獗倡建石門砦保全甚多晚歲下帷授徒及門多  
知名士弟先梅字少春拔貢生敦品勵學詩文負時譽

朝考以知縣用簽分廣東不就閉戶讀書以終著有庾南詩文集

麻城縣

鄒惺字克忠少從外父趙之英遊學京師蚤立名譽及之英巡  
視遼東病卒無嗣惺閒關千里扶櫬歸葬順治初土寇竊發  
惺與當事力保危城八年夏叛僕作亂偕邑人上變得鐵渠  
魁亂乃息縣吏叢姦賦常十倍惺數白諸臺司釐剔弊竇如  
餉由官解役由官雇至今賴之康熙十三年滇黔變起縣中  
蠢動惺陰破其謀時巡道徐郡守于撫勦並用悉如所言厥  
後子孫科第聯翩人以爲垂蔭之遠祀鄉賢  
吳晉爵有材略順治初邑東不靖同知于成龍督兵進勦爵助  
以僮佃千餘人事定後贈有勤襄允猷額又康熙時夏逢龍  
之變爵助義勇芻糧協力守城得無害知縣趙蒼璧復以額



獎之

周長流字子謙歲貢生父延齡有介節嘗客督師丁啟睿幕一  
總兵賴其力得陞遷持白金五百謝之不受長流承家學性  
尤好施捐設縣河義渡募渡夫置莊田區畫盡善先是諸姪  
相繼沒孀婦遺孤產業盡廢長流以己業分給之復捐建宗  
祠置遠近祖墓祀產知縣姜櫛稱其六行皆備云

李廷對監生考授縣丞性仁厚有友負千金不責償且厚恤之  
縣役捕盜誤致七人為力白其誣後果得真犯居恆教子姪  
以孝弟為本里黨咸敬憚焉子華 恩賜副榜亦勇於為善  
嘗捐義冢修橋梁施丹藥凡宗親貧乏者必竭力周恤之  
成撰字西翰康熙壬子副榜任枝江訓導篤志潛修耄耄不倦

邑中知名士多出其門年九十三卒

王琬字序周康熙丙子舉人資性醇厚動必以正嘗襄校山西  
試院人不敢干以私任岳州教授有廩生某以非罪入吏庭  
郡守將褫責之琬力解得免某亦力學成名後任湖北教職  
鮑珩字友韓附貢生康熙五十七年冬珩令保甲於附近五區  
中計貧戶授穀雍正二年邑大饑復捐穀給近村貧民五年  
陰雨連縣穀昂貴珩出穀減價以糶闔縣蒙惠又生員蔡瑗  
雍正元年賑江西饑捐穀一千石總督楊宗仁給額獎之  
李之素字雲山歲貢生言動必由禮義為邑中所矜式著有省  
身輯要孝經內外傳等書

熊調鼎字繼周胸襟曠達與物無爭家無宿糧而勤學不輟以



歲貢選訓導不就教授生徒多方開示邑里望其杖履皆曰  
我家先生輯有廿一史提綱等書

馮士彬字偉文天懷坦直行詣高潔以 恩貢應銓訓導不就  
交游或勸駕笑謝之邑令慕其賢三舉鄉飲位介賓亦不赴  
同人有就正者必直言無隱年九十終

程九萬字鳴玉少聰俊負文名族伯渭南家素豐乏嗣其妻阮  
氏立九萬爲繼數年族人突聳阮氏以渭南鬻婢晏姓有數  
歲子謂其遺孤設計購來更立之九萬卽日束裝歸不與校  
也

劉朝驥諸生里中李某身故子亡遺老嫗欲嫁其媳償朝驥負  
朝驥急止之立還其券乾隆四十三年大饑鄰族乏食朝驥

月給以米其逸行多類此

何世遂乾隆四十三年大饑罄所藏粟賑濟粟盡出田十餘石  
貸人聽變賣全活甚眾

鄭輝朝性淡定有王姓負債未償反自焚其廬而縱老母肆賴  
朝不與校爲葺其廬更資以錢穀其人悔且泣迎母歸乾隆  
五十年大祲有任姓乞糴於鄰不與朝廷至家給米數斗陰  
反其錢於米中

江萬年好施濟嘉慶間連歲饑饉萬年罄倉賑恤又借穀百餘  
石以益之遇流民給資斧全活甚眾後鬻田七石以償所貸  
至今人頌其義焉

吳泰來歲貢生爲邑南宿學博覽羣書兼通星象尤好獎勵後



進一時皆宗仰之著有碎琴集

張世鎮號南極諸生好學深思夜以繼日與袁銑同學白泉之中院數年袁兄事之晚歲授徒從游者不計脩脯人皆以夫子稱著有歷代名臣錄三才合一說等書

陶露柏字仙崧歲貢生學贈品端士林欽仰嘗主講萬松書院邑令某偶失禮貌柏毅然辭退詞義嚴正令踵門謝之年八十餘卒

胡應瑞廩貢生授嘉魚教諭生平賑困乏捐義田甚夥族婦羅氏貧寡無依瑞歲時給以錢穀且雇一婦伴之歷十數年羅之節賴以全

鮑芹堂字香巖好讀書博覽經史兼精岐黃術治病概不取資

極貧者自往診之且餽之藥近村有兄弟貧而鰥叩門告貸因慨然解囊遂得娶婦以延宗祏

屈光遠字星海布政司理問銜同弟光遠友愛好義嘗捐制錢一萬貫爲本邑文武鄉會試賓興資復捐田百石立屈氏義莊義學重修文廟費錢萬餘緡教諭萬之傑爲之記

羅公望慷慨好施捐義學於福田河街南顏曰培風書院並捐田數十頃延師課讀其他捐廟田修街道不一而足

羅守禮思禮志禮兄弟篤厚好義每遇凶年輒有周卹咸豐六年大旱河南尤甚饑民入境者絡繹時守禮已沒其弟同子姪等捐萬餘金買米散給全活數萬先後賑饑費三萬餘金並捐闔邑文童卷費錢五百緡後捻逆掠麻相戒毋入羅善



人門

胡鼎三童先桃俱諸生居同里少同學於詹兆朱桃性迂直三尤慷慨任俠咸豐四年粵匪竄境兩人倡謀殺賊義聲播遐邇自後團防四起屢率勇隨知府許賡藻出境助勦又嘗主東鄉永清局與甘國楨等同心督練皆為讀書好義之士

黃安縣

黃漢臣字勒鼎拔貢生敦品力學順治初土寇披猖密書誘之漢臣潔身遠遁嘗捐金為從弟贖產教孤子成名宗族貧不能斂者備棺給之赴

廷試時有友人為謀速選以父年老辭歸

韓名世字友生祖勳拔貢生積學勵行父瑞璋生名世踰月而

沒母吳苦節撫之明季世亂士多廢學名世獨閉戶讀書為石壁藏書數萬卷有就業者資以膏火母沒廬墓三年又著述經史詩文於廬中者二年年六十四卒

姚應巍字德昇諸生刻苦食貧冬夜讀書以木棉擁足常達旦授徒羅山羅仞南劉海宇亟重之有執紼子頗怠業巍訓之語罷遽辭歸曰安能以阿堵物誤人子弟舉鄉飲賓辭不起子觀性耿介類其父以歲薦徒步入都中表盧某令永年遣騎強邀之至其署信宿即行一無所取

王志隱逸移人

江佐清字君翼諸生幼以孝聞父沒母目瞽飲食起居朝夕服侍無少懈值歲祲出粟以賑貧者不逞之徒反乘間以掠其餘有司嚴捕之清曰吾施濟不盡於人何尤力解之事遂寢



方仲公以字行好學工詩與耿子家僧天則善子家嘗遠游傳聞已死仲公徒步千里往尋之遇諸塗攜以歸天則病漢上仲公往問凡飲食藥餌必躬親及沒復經理喪葬乃返生平無蕉葉之量而好讌客客至每典衣盡歡惜卒後著作散佚鍾珩字仲玉諸生家貧好施嘗有丐者鬻其子給錢五緡不受契後適他郡遇一人迎宿其家視堂上尸祝主爲己姓字詢之卽鬻子者也應試黃州有蘄水文童覆舟僅以身免將行乞歸珩留寓資給之遂獲雋後造謝出息以償概不受邑有冤獄屢爲白於官其人來謝亦拒不見卒後邑令徐爲文祭之比之郭有道云

韓陶世字用嚴諸生嘗奉父命往均州途遇父子泣者詢知負

貴人債訟於官急鬻子以償世如其數與之遇老嫗哭甚哀曰夫死無嗣不能具棺卽傾囊以贈歸請資斧父喜曰恤寡憐貧子素志也汝不愧麥舟矣

張楚賢諸生寡言笑好古成癖講學於華嚴菴閉戶十餘年正襟危坐嘗曰聖賢之道惟在主敬生平動靜語默無一或苟陳道賢道文道謨行義不倦康熙五十七年大旱捐穀二千石廢產八十餘畝於土庫店設粥廠以賑饑人其後有貢生必隆者亦慷慨任俠里有牙角爭必爲排解人咸德之

秦仲武字右泉事母孝嘗經山僻聞婦人哭聲甚哀詢之則以夫繫獄將轉嫁贖罪者也卽傾囊以贈又有無辜株連鬻子者爲出金贖之後爲江甯通判多善政解組歸煮茗施粥修



道成梁諸善事行之不留餘力

華文海天性純摯父沒廬墓三年尤喜周人之急有楊姓被誣控將鬻子海湊金與之吳某以債故自縊救之蘇代償其負生平淡泊自甘足跡罕入城市

韓思純諸生家貧好施乾隆四十三年大饑道殣相望純典衣鬻產捐粥三次復向富民勸捐全活無算

吳兆澧字稼軒乾隆歲貢生孝友剛方理學深邃值歲歉輸粟濟貧主講邑中書院六年無干謁無偏私人咸欽服後授房縣訓導卒於任子大桂 恩貢生以博覽稱著有清白遺編張光坦字汝川諸生生七日失恃事繼母孝友愛二弟析居時以美產讓之乾隆五十年歲大饑力不能賑有山木價值數

百金許鄉人採以易粟年七十八卒

吳之琬字孔煥監生好行善事嘗修石橋者三施義渡者二建祠宇者一乾隆五十年設粥廠以濟饑人多所存活

張智坦字縝圃諸生品學純粹重然諾好施與乾隆五十年歲大祲罄所有以濟族戚萃里中俊秀建塾延師課之讀資以膏火生平懿行至今人猶頌之子錦珩詳文苑

汪德綸字心瑾歲貢生乾隆五十年歲歉鬻產周饑兄弟三季弟早逝撫姪如子並招仲弟暨孀妹同居以娛親志主講萃英書院光明磊落學者宗之子潤詳宦蹟

王華平字春植乾隆壬子副榜生平行坐必端不妄言苟笑舉子甫數月婢抱之墜火殤婢惶恐無人色平曰數也不之咎



有山與鄰近鄰冒為己有平書契贈之居恆以善教人里有

牙角爭得平片言立釋所為詩亦多清新可誦節縣藝文志本傳

秦光鼎字調齋監生沈靜好讀書五薦棘闈不售乾隆時歲饑

族戚就食全活甚眾嘉慶初教匪犯境首倡練勇守城賊旋

遁居鄉遇事排解每出一言無不感服族有節孝戴氏已蒙

奏請建坊苦無資鼎仗助之貞珉至今屹然

徐高泰家貧事親孝親卒家漸裕每飯泣然流涕痛親不逮有

友寄金八百於泰友暴卒人無知者泰送還其家又葉某為

人會計失百金泰如數給之子立方監生亦好善同治閒有

二童自賊中逃出去家各數百里立方資遣之

孟謙高好善樂施嘗外貿遇無賴子窘極逼妻為富商妾高贈

以財物遂為夫婦如初又里某借銀納官糧屬婦藏之為鄰

家竊去婦自縊高聞急呼其夫解救傾囊與之婦賴以存

熊錫亨字會嘉歲貢生篤孝友年垂暮事親如孺子兄弟四人

伯叔季俱先逝亨課生徒遇孝弟字輒流涕生平克己寡過

喜讀儒先性理諸書嘗著檢心錄以自警年八十五卒子漢

字星槎亦歲貢生性方直知縣王葆修凌心垣常延訪地方

利弊深引重焉

彭國欉號樸齋歲貢生學宗程朱文倣蘇柳及門多名下士居

恆不問外事沈靜剛直鄉里嚴憚之子煥興詳文苑

熊章文號斐然監生好施與嘗建樂善堂置救生船施捨藥材

棺木棉衣不可枚數歲荒捐席篷開粥廠皆竭力為之



盧學溥號淵泉諸生少孤事母孝咸豐閒屢負母避賊課徒以明理盡倫為要歲得脩金輒分諸兄弟他如還遺金瘞殘骨收瞽女援溺人盛德不可枚舉

張鎮字錦城附監生品端學博家寒素歲獲館金輒以其餘製寒衣買棺具給戚里之凍殍者

耿潢字鎮川熟於先儒語錄言動悉有法程旦晝所為夜必登之日課以自警家無儋石從不乞憐於人其徒熊汝梅官蜀中累書招之不一往以安貧樂道終其身

羅田縣

嚴欽謨字廣盛諸生學問淹雅品行端方訓戒子弟常以崇實去浮為首務順治初流賊蠶起謨倡捐募勇堵禦鄉人賴以

保全

林煥騰字孟詞秉性純厚敏而嗜學義利之辨最嚴邑令心儀其人然講學外罕見顏面子四皆諸生並有名邑人雷天鐸少貧困騰飲食教誨卒成進士

葉敦舉字朝選天性敦厚讀書以窮理為務父年七十染危疾敦舉禱天願減己年增父算父疾果愈年逾八十嘗建祠置產捐渡濟人座右徧書箴銘立功過格以自警

廖湖字五和監生好施與每歲杪散米五十石絮被綿襖累自平時亦多推解

蕭廷元字守士幼失恃事繼母能得歡心與弟析居割腴田以讓之性好施嘗以葬地與人歲饑出穀周急里有因貧離婦



者代贖之俾得完聚

傅元佑字右人好善樂施每歲暮捐棉衣絮被糜粥貧人多賴以存活有鬻妻償債者出金代償全其夫婦

陳泗樹諸生素與周士宏友善宏故貧士病革以幼子鼇爲託及卒樹收養之偕子姪就學九年鼇年十七爲邑諸生旋列明經邑人至今稱樹之能篤友誼焉

郭地煥字星岳歲餘失怙母氏艱苦節撫之成立由恩貢以教職用不就生平稟性剛方遇事決斷鄉里無不帖服創立邑興賢莊採輯縣志不憚辛勤克葺其事時有葉大鵬字程遠亦以歲貢選教職不就接理興賢莊悉臻美備又嘗捐穀百餘石爲族祀產焉

王鳳翥諸生慷慨好義歲荒有鬻子者翥出金受之旋妻以婢越數年其父來視翥焚券俾偕父歸同時衛千總王蓋英字遠峯嘗於歲歉值鬻孩者買爲僮長配以婢還其券資遣之李學勳字映璋諸生品學俱粹知縣孫湄延之課子鄉人有構訟者密賄勳求解免勳正言責之卽託故解館歸

晏文鼎字錦舒髫齡入泮事父母至孝年三十失偶終身不娶教讀數十年門下多知名士生平行誼卓越知縣趙振清極推重每云錦舒有非公不至遺風

鄭紀漣字居正貢生議敘鹽知事嘗捐田二百餘畝爲試卷費後值大水田壞復捐錢爲修理之邑有貧不能殮者常給棺木助葬費子懋昭字德鄰歲貢生候選教諭捐田七十餘畝



益書院膏火並補卷費之不足梁家灘兩河口義渡費亦賴以給昆季三人其父以昭居長且積勞遺命田產兩分之昭得其一及別居昭仍析而三馬里中貧不能讀及應試無資者昭常飲助他如減糶拯饑諸善行靡不備舉

葉炳蔚諸生德性純粹伯兄湯獻中年失明蔚扶掖周至甘旨必豐居家塾四十餘年來學者必諄諄教以先行後文熟於小學及先正格言鄉里有爭者輒引數條爲解釋年八十卒陳瑞珩字慶昇諸生豪俠有膽略嘗雨雪中遇湯某僵仆於地解裘衣之得不死又嘗造棺木累百以給貧民咸豐四年粵逆躡楚借弟瑞璿捐貲募勇戰輒有功同治三年賊虜至珩退保熊崖若揮長刀率壯士迎戰手斬大旗賊目一人生擒

#### 四人餘悉遁去鄉人獲全

王渭封號竹村州判慷慨樂施里中寒士不能就傅者助以膏火多所成就嘗捐金百餘修石橋以便行人咸豐間知縣彭仲芳殉節於羅羅人爲建專祠封倡捐田百餘畝爲香火資童先福字柳坪官訓導樂善好施出於至性舅氏沒代爲殯葬並捐田擇人護其墓同里趙坊與福友善坊卒福爲撫遺孤割田四十畝以贍之家買二婢詢知有夫俱招至團聚予以生業其他施棺木恤族鄰瘞枯骨善行不可枚舉

張邦基字翼亭增生好讀書藏千卷於靜室非同志不得入嘗捐資倡立義學族中貧乏者輒資給之道光壬寅及咸豐丙辰大饑籌錢糴米按戶分給有負其債者約千餘金不責償



蕪州

劉匡生字生事親以孝聞居鄉尤多義舉品望端凝州人矜式之年六十舉順治甲午鄉試未仕卒孫文起舉人靖州學正有文名蚤卒文超自有傳

張泮字叔度順治庚子副榜羊采蹕厲與姪士淑學修切磨老而彌篤盧紘修州志泮與其事多所裁正後選天柱縣訓導以老疾辭

龔柏字百子康熙歲貢生篤志好學至老不倦品行爲士林所尊著有半畝園詩集顧景星爲之序

李永昇字志南坦子康熙庚午舉人性豪爽無私曲與同里張仕渾馮以觀顧昌相友善每譏集賦詩節響清越慷慨悲歌

聞者壯之著有若臆村集

張梗字孟楠康熙庚午舉人選歸州學正辭不就嗜古工詩居鄰雲母山多古松築萬濤園朝夕觴詠其中足跡不入城市著有萬濤園詩集後有陳鼎元號澗溪諸生築園於河干修篁古木遠絕塵氛家多藏書知名士往來攷正無虛日著有半畝園集

吳善玉字百美監生操行耿介尤樂施與里農苦無牛者輒買給之嘗載麥泊陳子鎮值水荒貧民持券乞貸至百餘家玉一一應付如期往責貸者無以償遂火其券以歸

張國翼字雲翥諸生性剛直有爭者質之輒解爲州牧李所知會李擢撫州郡丞去旋卒翼走千里賻之且爲鐫其政蹟於



石晚年鑿靈巖寺險道以利行人

陳正經字綸章諸生肄業 國學性孝友樂施與會各屬丁隨

糧派經力襄其事爲士民倡州人德之子履中詳宦蹟

張啓翼字仕翰康熙歲貢生任應城訓導教士以敦本爲先邑

向無學署翼損資建造乞歸後值歲荒收卹族鄰輿論稱之

李澤溥字沛蒼康熙歲貢生才識過人知州張士駟有疑案不

能決延溥至頃刻立判家世貴顯饒於貲溥振乏絕卹姻族

散藥施棺鄉里德之漸俗富家田往往限年易佃溥獨不然

令子孫世守焉著有雨湖閣文集

陳治猷字贊侯康熙歲貢生任應山教諭正己愛人邑有陳生

貧而嗜學年五十未娶適往江南過蘄治猷父以四十金贈

生生驚謝猷父曰勿謝兒書問申請以此助君娶耳生受之  
乃有室

王星慶字皇士廩生性和平樂施與族有孤子公瑞者無所倚  
星慶給腴田經紀其家俾得成立又朱氏子兩世單傳貧不  
能娶祀幾絕星慶資給完娶士論賢之

劉文超字大章匡生孫雍正歲貢生簡質靜穆有古君子風授  
徒三十餘年門下多知名士撫教兩孤姪億估俱爲諸生超  
無子以信嗣

秦京字永畿雍正癸卯拔貢家貧無子皓首窮經當時士大夫  
咸敬禮之京與州人熊楚荆張畸郭從李生槃黃載華黃載  
嶠及釋重珂結吟社稱雨湖八子有合刻詩集楚荆字漢南



崎字子駿載華字砥南載嶠字丹崖皆一時好古績學之士  
各著有集從詳藝術生槃詳文苑

何一貢字序尊家世豐厚好施與族有貸貢貲死於外者貢  
越千里舁其櫬歸不責前貸仍周其妻子鄰有鬻子者貢捐  
金贖還雍正五年歲饑穀價昂率姪開卷等減價糶穀六千  
餘石遠近賴之

陳滋古字書潤歲貢生性伉爽勇於爲善雍正五年捐穀二千  
石煮粥賑饑族鄰有貧乏者每歲出穀分給之知州蔣嘉年  
以敦仁好義表其閭

李鑑字治凌事繼母以孝聞捐修北關外橫街輸糧者稱便周  
卹鄰里減糶拚幣善行著聞雍正十年以善人舉各憲旌其

閭

袁培松號石齋監生爲人岸然負異有古高士風親喪廬墓三  
年遇 國制則易服而泣居常閉戶人罕覩其面嘗慨世俗  
爲形家所惑著有風水本義一書

張協占字吉菴諸生屢躋鄉闈著書自適踐履純篤一時奉爲  
典型乾隆九年公舉鄉飲介賓知州蔣尙德重其人給額獎  
之

童有念字禾周少孤事母孝侍疾三年不少懈里有二孀婦貧  
甚母憐之有念給衣食以全其節族有貧不能娶者輸金爲  
納婦又捐修橫河橋圳口路數百丈行旅稱便

王鑾號槐村增貢生慷慨任事倡建麟山書院偕州人黃載安



等捐銀二千餘兩置膏火田復集修 文廟州志費計千餘  
金歿後知州錢盞親致祭于世澍諸生經理書院三十七年  
視如己事費絀屢捐貲以助州人賢之

袁開宙號哲軒乾隆歲貢生性慷慨其女適陳未一年而寡遺  
腹子詩賴開宙以養以教得成進士爲名儒

一陳述古字彭儒監生乾隆初捐穀數百石入社倉五十年大饑  
述古時寢疾命其子施米繼之以粥復令告糴豫章廣爲接  
濟至麥登乃止蜈蚣頸巴家橋大王廟界嶺等處橋路皆述  
古修建

陳尙義年五十無子買一妾至之夕哭甚慟問之則固有夫與  
子不索其值而遣之已而慮其別鬻也更多予之貲其夫妻

母子竟得完聚後尙義髮妻柳氏年五十學生二子

王椿號華顛初爲諸生善詩文工書法與陳詩同受知於胡學  
使居恆踐履敦篤酷嗜宋五子書著有周易輯要儀禮經傳  
通解典制窮源四書尋繹等編子映齡諸生亦以學行見稱  
陳其殷字楚奎嘉慶庚午舉人一試春官不第遂絕意進取鍵  
戶讀書無寒暑閒著有知鑑錄續綱目讀史餘言尤精岐黃  
著有脈法指掌經絡會解諸書

張廷贊號石潭勇於赴義嘗建宗祠又獨力捐修 文廟費白  
金萬餘他如陸家橋大徑橋烏龜石諸要津各捐船渡而於  
下河廟橋屢頽屢建尤大費財力州牧重其行舉鄉飲大賓  
方蒼壁諸生嘗遇歲饑竭廩穀三百石以贍族里不足又稱貸



黃州府志 卷之二十四  
數百石已而鬻田償之

李興憶號南坡監生徙居英山生有異稟好讀書教子孫咸有家法尤喜施與如賑饑民設義渡修橋梁治道路諸善舉詳英山縣志流寓傳子克鳳爲人樸厚剛直以孝稱後死於難黃兆魁字葵圃道光丁酉舉人咸豐閒巡撫胡林翼駐節巴河招人戎幕命與某友勾當軍需某嫉魁持正多方牴牾泊胡公議罷某魁力止之胡公語人曰黃葵圃真君子所謂犯而不校者也與以官不就歸益潛心經史著作甚富

胡南薰號全吾廩生 恩賜副榜少從孝廉陳良珏遊陳老負之出入者三年後究心經解道光中朱學使面試水道謂所解非三十年不能辦巡撫胡林翼嘗索其書助百金命繕就

付梓未幾胡去弗果著有禹貢山川圖考二卷藏於家

張鳳翼號梧岡監生性端方好施與道光十五年大旱率兩靳豪族開廠賑饑存活甚眾咸豐元年偕二子鄉試路遇素衣婦人哭甚慟詢知其將鬻女以養姑者鳳翼傾囊給之是夜寄宿古寺大風雨壞壁遲明於壁中得錢數十緡人以爲獲報之速

王士達號宗溪廩生性端方七世同居內外嚴肅雖居城市不尙紛華惟以獎掖後進爲己任至今閭里猶稱其家範焉陳位殷號哲生增貢中書科中書銜少負雋才文詞清麗旣屢試棘闈不售益潛心實學教子一經於富貴澹如也

洪在上號雲亭監生好義舉嘗捐貲築白水湖圍隄逾二千金



命子克昌董其役時有監生龔順捐千金助修土人並祠祀之

廣濟縣

程命甫崇禎末寇亂遺骸遍野甫悉爲收埋歲饑甫自江右載米歸里中多賴以全活徽人王時宇少鹽課夫婦將投水甫爲代還其課周子良欠地租賣妻以償甫爲贖還令其完聚范應明字起公諸生明季寇擾應明居喪朝夕衰絰哭旣葬廬墓不以亂廢禮寇掠里中婦女十餘人傾囊贖之不給則繼以豬牛有夫久陷賊中應明爲資給其婦數年歲饑里中不能自存者舉家鬻爲人僕應明鬻產贖歸之

舒芝生字瑤草其志孫順治庚子副榜任麻陽教諭性孝友父

母昆弟無閒言邑尉湯銘樞不能歸芝生倡捐伙助有黎蘇生者與芝生同入監黎卒召其子賻百金得扶櫬歸芝生與兄並生弟觀生繼先世業俱以詩文稱雄時有三鳳之目干應採字擇可監生順治癸巳己亥歲祲前後捐穀一千一百五十石又施被緜棺木歲以爲常子爾漸歲貢生敬禮端士周恤貧乏無吝色

鍾汝瑞字景孚有義行康熙十年歲祲捐穀一千五百石救饑又捐金修靈西橋

胡一玠字石存一塘弟廩生有別業名容園日與知名士游處康熙十年歲歉賑活無算羅某鬻妻陳某質子皆助以金不足則困粟繼之爲宗族故舊舉其婚喪而撫其遺孤者不可



勝數子繹思字綬文諸生值歲饑自食麥設粥廠以濟鄉黨  
知縣鄭理旌其廬統思自有傳

陳三鳳字東鳴家僅小康而樂施予邑大疫捐貲賻棺千餘具  
貲罄至拆屋梁代之卒之日聞者流涕子宣闡自有傳

劉自澄州同銜康熙三十二年歲大饑約諸弟出穀賑貸歷三  
月儲積悉空有卒於官者收卹其家且教其子及成立厚贈  
遺之嘗以四十金置一婢既至知己字人急呼其父領歸不  
索值

魏尙忠字孝資少孤事母孝外祖鄔姓乏嗣忠爲伐石表墓並  
置祀田康熙三十二年邑大旱出田租三百六十石分給饑  
民偶至湖口縣同寓蔡某被盜欲投繯忠傾囊與之值蟲荒

有張姓鬻妻爲捐金以贖張願爲奴固卻之子洪賓詳文苑  
宗人尙惠諸生亦好義有表弟貧爲僧以館穀贖歸並爲娶  
妻以延舅祀故人胡天旭死亦教養其子成立

李如金里人谷某貧乏將鬻其妻如金贈銀三十兩得勿鬻康  
熙五十六年歲荒售產富室獲穀二百石以周鄰族明年大  
疫捨棺二百具葬男婦之無依者年八十六卒

胡統思字恪先一玠子康熙時兩中副榜父晚年患痰疾日在  
牀褥每唾統思必手承之泊居喪哀毀骨立督家政有條理  
性好客尤重廉介邑令李延爲義學師弟子多所成就

陳宣闡父三鳳有義行早歿宣闡事孀母張躬耕奉養以孝聞  
初貧窶後家計漸裕值災疫流行施構二百具又置義冢於



縣南登高山子宗岱諸生亦好施與

李六奇字祕成諸生父歿廬墓三年徽郡汪某緣負債鬻妻奇贈二十金保其家室嘗自郡歸途遇江西吳某以飢寒交迫夫婦將投河奇攜至家厚贈之得全其生年九十六卒

彭華國字玉書諸生居親喪廬墓六年嘗捐二百五十金贖族所鬻之墓木以保祖蔭又捐百金贖族人所典祭田兩次重修車坊鋪石龍鋪橋費三百餘金每遇荒歲必減價平糶里人稱之

胡澤民字守宗諸生歲祲輒出穀以周貧乏嘗市絮被予雪夜之無衾者買一僕有戚容問之曰父爲債所迫民立焚其券資遣之年八十卒

張希集字臻成慷慨好施嘗因族人志德之嗣恐其先不血食捐穀六十餘石爲祭費里有張某苦饑將鬻子爲撫字十餘年且爲定婚配有於某奇窘將鬻妻持金贈之夫婦得全又嘗出貲助貧不能娶者二人邑東鄉木溪坂素無橋梁捐貲建之年八十四卒

熊啟聖字承三監生幼失怙恃事諸兄友恭備至嗣卹宗黨捨棺木施絮衣率以爲常乾隆八年歲凶捐米二百石助賑嘗買僕婢詢其父故諸生也立還之

吳保璽字國玉州同銜乾隆三十三年歲大祲施粥活饑民以萬計陽城山爲邑往來通衢險仄難行璽捐金開道牛肝積布各磯巨石激湍流舟觸之多覆沒璽於水涸時鳩工鑿之



行旅得無患

李學蓮字汝青監生父大材性仁厚嘗懸學喫虧三字額於庭以訓子弟蓮體其志爲親購葬地費鉅不以累兩兄乾隆五十年大旱貸雷姓錢賑饑族之貧者娶助聘殯助棺讀書助膏火他如修河橋瘞暴骨立古塋碑碣靡善不爲年九十卒劉雲翥字吉菴諸生生平以禮自持雖燕居獨處未嘗見其跛倚終日手一冊至老不倦家教肅然閨門雍睦好周濟貧困有丸藥二種製成必焚香虔禱曰願服此者人人痊愈後力不給猶典衣繼之子樹瑤廩生居心制行克承先志饒振翼字耐亭監生田租計三百石歲儲其半以周貧乏不能償者聽之偶至黃梅小池口拾遺金數百悉還其人無德色

嘗有盜入其室翼覺俟家人熟睡呼之出再三勸諭並緝以資盜謝去卒改行

劉蔚桂號厚齋好施與如置義冢捐祀田修鳳港橋皆獨力爲之無少吝租入極薄銘其斛曰天年不一人力惟艱少收一斛多收幾年嘗過挂口舟覆昏夜若有紅燈前引浮至岸得不死人以爲忠厚之報子鳳詔字丹墀監生克繼父志歲祲冬夜爲粥以食餓者親族給以米杜門教子後皆貴顯子映丹詳宦蹟

胡振龍字雲生素與同邑宋某善宋因事繫獄龍出二百餘金解之嘗過蘭谿投宿村舍夜聞哭聲甚哀問之乃因負租將鬻妻龍惻然命僕取金六十兩俾得團聚時年四十餘尙無



嗣夜夢神命復娶遂連舉七子

熊日模字範齋道光戊申己酉大水捐賑累數千金年七十家人議稱祝模不許以其資伐石修路行旅便之

劉鍾榮號小谷歲貢 恩賜舉人天性敦樸制行端方生平讀書外幾不知馬之幾足學問淹博尤粹於經義五經集註至老猶能背誦主講滄浪書院有年同治十年襄輯縣志年九十餘卒

朱美旌號卓夫布政司理問銜伯叔無子者四旌事之如所生道光十二年歲大饑族中多斷炊者旌皆給之粥同治開連年水漲旌舉家食餽粥而族人恃以無患並將穀數十石貸極貧者不責償

楊枝燦字白谿歲貢生家貧力學性簡介慎交游朋友或有過輒面規之其論詩文尤精不肯絲毫假借同治十年編輯縣志邑人士咸以體裁簡當稱焉

黃梅縣

汪慎言字敷公貢生兄弟八人皆列庠序慎言博學多才負氣尚義有故人子被誣繫獄爲之伸雪里人爲債逼將鬻妻慎言代償之俾得完聚

胡淑字宗遠君孚子諸生有血性遇事敢爲如革里排清兌弊免徵役南漕改歸本地驛銀坐支起運凡關邑中利害者靡不身肩其任力求盡善而後已至施棺構助喪葬義舉尤多喻穎字魯成諸生性純篤好義舉崇禎十四年流賊陷城穎纔



十齡導母縋城出得免及長捐腴田百餘畝以恤宗族每值歲饑輒散粟數百斛知府于成龍題額以獎後舉鄉飲大賓黃利通爲文紀之子于智自有傳

梅光啟字開士諸生有爲豪家索債將鬻子爲僧者光啟質產代償且以餘金授之曰留此爲日用需勿復貸也

石永年號鳳池廩生任興國州學正年四十卽解組歸歲祿出粟千石以貸貧者或米價騰溢減值之半以糶市買爲平知府于成龍旌之

趙之曾字沂公康熙歲貢生性敏嗜學喜周里黨賑饑貧凡借貸弗償者置不問子士泰工詩著雪亭詩集喻文鑿亟賞之蔣天桂字蟾木康熙癸巳舉人弟中璧字鳴喈雍正甲辰舉人

兩人敦本睦族遇歲歉各出粟貳卹不計償橋梁有傾頽者卽捐金修築

梅文字二郁諸生性謹飭鄉社讌集恂恂其閒嘗捐金建宗祠爲族人立約束法祭時第其行誼而旌別之雖親屬無所避子天鈞諸生孫渭舉人俱有學行

吳夢梅字調五監生重義輕財乾隆二十九年江隄決散穀數百石以賑貧溺子書田附貢三易增生克承父志捐建路途鎮河西石橋往來稱便

喻于智字醒愚監生慷慨有父風父穎嘗捐惠族田一百三十畝族人以事售出于智贖回之歲歉賑饑解家口隄逼近外江于智捐糧地數十畝隄內移得完固又於化龍門外改舊



河建文昌閣捐銀一千七百兩有奇嘗買樊魯占田魯占卒以田給其妻子其子死無後于智子之塾又為營葬具嫁其女俾主魯占祀之塾子文鏊詳文苑文鏊俱詳宦蹟通志陳其雯字儲士文炳子弟志陞字履謙皆諸生其雯建宗祠置祀產性和緩無疾言遽色志陞頗下急而真誠自矢有外姻再世而孤力為撫之二人子孫俱知名

余心極字碧開諸生矜嚴好禮作止有則未嘗與人忤而人自不敢犯嘗曰人生惟安分守己最受用故邑余氏最有家法胡鎮楚字宅湘乾隆歲貢生刻意勵行嚴義利之界自少至老不輟學博覽羣書為文浩博奧衍後授當陽訓導

李一鶴字雲騏諸生幼穎異究心經史為文成一家言好周卹貧乏訓子孫皆成立能以文學世其家著有懷清堂集

石鑑字冰鏡乾隆歲貢生動履矜慎學問精實為邑雅望知縣吳教諭王交薦人才檄下不就日坐皆春堂課子姪著書自娛子為藝詳宦蹟

李懷若字超倫為人方正族鄰有過失輒畏懷若知而懷若心實慈厚有因債逼將鬻妻者為代償之事遂寢嘉慶戊午年八十舉於鄉明年 賜翰林院檢討

許有翼字鶴舫附貢生創立賓興館捐田五十畝又出錢四百緡助修學宮奎星閣書院次第落成鄉鄰爭訟常捐貲解釋戚友賴其分潤者不可勝數姪孫芬字春溪例授州同聞有翼創賓興適疾革亟稟母趙氏捐田百畝益之母卒邑人



為祠於館中

尤文華字光斗族中孤貧胥賴存恤歲歉鬻產以濟所修橋大小凡九座有路出叢冢中為別修石路以保衛之卒年一百有三歲子孫五世同堂 旌表建坊

胡邦彥字燦字嘉慶戊辰副榜性傲岸與人交際稍涉誣諉干謁輒掉臂去之時掇科名者競尚路史竹書文選邦彥曰是詭道也讀聖賢書而以此獲遇不如不遇故垂老不遇以副貢終

梅華敏父文運監生疏財好義嘗欲捐縣試卷資未果華敏與弟吐玉克承厥志於嘉慶二十一年捐田九十五畝付房書經理闔邑至今賴之

桂燦庚監生家頗饒自奉儉約而樂施濟尤喜繕橋梁如衡沙橋仁壽橋白湖橋雖費多金勞心力不恤也宿松石編修葆元嘗為之贊

商斯美字士玉貢生好行善事嘉慶二十二年捐田八十三畝作闔邑府院試卷資旋以田課多窒礙易錢一千二百緡發典生息姪承德監生補捐錢二百緡後有監生桂中明捐錢作鄉試卷資今已撥入崇文堂置買田產

蔣楚鐸字傳之諸生敦品績學或延之課子弟必審擇其人而後往故出其門者雖世家子率怕謹無澆薄習族子恩滋孤貧訓課十餘年不受脩脯卒為名孝廉

蔣楚璠字魯堂諸生率弟輩讀書樂行善事邑稱小南門蔣氏



堂伯母貧無子迎養十餘年喪葬盡禮再從姪恩濊幼孤貧其得成立皆璠與楚鐸教也

余朝蓋字觀成歲貢生性端介酷嗜學諸經皆手錄子史百家過目必撮其要著經藝餘談分天地人物四部悉見根柢

胡春元字輝祖監生樂施予道光十二年邑大饑出穀千餘石拯濟子思藻於大水後檢埋骸骨至數百家人謂其能繼父志云

石寅賓字茂倫監生咸豐三年粵逆東竄邑南關外橋梁久廢奔避者往往陷溺賓急為修復費二千金不署名鄰里貧不能遷者近百家悉資助之其他義產義莊義塾之置甚夥補遺

黃岡縣

華兆鈺字質堂布政司理問性孝友少勵志於學喜敬禮宿儒長者與邑士靖厚欽朱兆斗稱莫逆交尤樂施予道光十一年大水出廩粟數百石以賑饑他如建宗祠置祭田捐義冢修橋梁善舉甚夥知縣俞昌烈嘗以明義急公額獎之卒年八十一孫祐禧監生克承家範亦以篤行稱

范華玉號寶田由翰林院待詔保光祿寺署正加五品銜賞戴花翎生平勇於為善里人蕭姓者家貧鬻其婦議已成華玉急走人贖以金且給之衣食河南民年饑鬻媳亦為給資遣之歸咸豐閒軍興華玉捐資助餉以萬計家素饒因是中落初無悔志知府許賡藻贈以詩云抒忠益信貽謀善人物



西陵第一流蓋紀實也

蕪州

王聖埏號平原候選從九性樸誠兄弟極友愛嘗運糧艘外戚張元理客山東病卒適黃岡汪封渭知德州稔埏名以理糶及金幣附埏舟南旋會髮逆亂道梗糧艘停泊清江埏買地安厝理糶并封識之歸以金幣盡遺其子其義行多類此

黃安縣

張家俊字灼三道光乙未舉人授大冶教諭躬行表率並立學規十餘條一時士習丕變歸里主講萃英書院循循善誘尤喜振拔單寒同治八年總修縣志年八十二卒

黃州府志卷之二十四終

黃州府志卷之二十五

黃州府知府英 啟纂輯

人物志

隱逸

唐

黃梅縣

李玘開元中明皇夢神自稱廬山使者請立廟廟成詔刺史獨孤正訪諸工文辭者製碑以進凡六百八十一人獨玘文稱旨詔舉博學鴻詞不就或勸之對曰世所稱詞學何如張九齡裴耀卿賢今概以李林甫罷去予安能保予之必終也竟築室東山麻林之窪讀書樂道稱衡門居士以老



宋

黃岡縣

王文甫博學篤行隱居不仕東坡來黃嘗因其弟子辨過從往來凡四歲及移臨汝有留別王文甫記

麻城縣

張慙子隱居九螺山自稱九螺山逸人東坡志林所云黃州故縣張慙子行止如狂者也熊吉贊云內史之慙以閑其君惟子之慙獨成其身龍德而隱今鮮其人九螺之山因子益名王翊居岐亭建桃黃庵自號桃黃山人熊吉贊云桃黃之庵中有隱君尸居蔬食抱樸含真匪道曷依匪善曷行無懷之民葛天之民

蘄州

林敏功字子仁年十六以春秋舉進士下第杜門不出者二十一年博通五經尤長於詩元符末詔徵不起賜號高隱處士弟敏修字子來亦不仕終老以文字相友善世稱二林

吳瑛字德仁父遵路博學強記議論英偉官龍圖閣學士瑛以廕補太廟齋郎仕至虞部員外郎告歸臨溪築室種花飲酒超然塵俗之外嘗有盜入室覺而不言及取被乃曰他物惟所欲夜正寒幸舍吾被後召為吏部郎中就知蘄州皆不起卒祀鄉賢詳宋史隱逸傳

廣濟縣

宋琰字子文少舉進士晚退老西郊增完舊構一觴一詠優游



以終元祐七年卒濟南林述祖誌其墓宣德郎陳璞書碑邑

中金石文字以此為最墓誌見金石

梅國淳縣志作醜字作所應春子工詩賦宋亡肥遯林石武昌程平

章薦之屢聘不起謝之以詩詩見集部

姚楚山明爽有智略屏跡山林日事吟詠過其廬者皆稱為白

雲處士家卒祀鄉賢縣志作元人

黃梅縣

黃眉翁失其名寡嗜慾雅歌酣飲咸瀟閒已百歲空谷中遇異

人授以藥謂可再周甲子果一百六十歲眉長三寸垂兩額

故人稱眉翁

元

黃岡縣

范愷字士元博學能文性淡泊不求仕進家雖饒裕處之若寒

素年九十餘終

吳應澍性悖實重義樂施歲饑設粥於路貧不能殮者助之棺

置橋四十餘處井十九居民便焉湖廣平章事以聞詔徵不

起御書西山二字賜之人稱西山先生後祀鄉賢子琳琛俱

詳宦蹟

董敬中字仁輔大德八年為參知政事明初隱居團湖因以自

號劉基屢薦復躬往聘之竟不起

廣濟縣

何朝舉有志操師事饒魯養志巖阿不樂仕進著有文公性理



吟卒祀鄉賢

黃梅縣

汪堯舉字熙甫清介自立天歷中登進士第不受官歸隱林泉詩酒嘯詠以終

楊俊字士元初為諸生厭之遂棄去覓石龕古礫山中優游偃仰一百三十歲卒

明

黃岡縣

吳榮一洪武初棲中和里石壁山種蔬養鶴博覽豪吟嘗荷鏡斲藥以濟人弟榮三元末廩生與兄偕隱或勸之仕曰吾已食餼於元何仕為厥後有王瓚及思裕者俱以隱德名

張岐字鳳鳴本姓周幼失怙事母孝好讀書絕意科目隱居邑西之樟松湖雅談橫經操觚至老不衰年八十八焚香端坐

而逝楊慎為銘其墓稱曰萬松處士子澤詳宦蹟墓銘見金石

樊志張原名維甫字兩同縣志字山圖隨父玉衡成雷陽二十四年及父歸卒志張哀毀幾殞遂不應鄉舉潛心易學益王遣使再聘皆不就著有易象易數易適易占諸書

袁希燮字子理文伯子年十五和李維楨宮鶯白鷺詩各十章維楨大器之已而與三袁唱和又與喻羨長錢仲舉贈答於

金陵遊跡幾半天下歸隱茅山之麓結茅曰遯園以著作娛老子璜琮副榜詩文敏捷有稱

易為鼎字用王生而有文在手曰汪號汪來子蚤以文章氣節



著明季學使高世泰修三楚文獻錄鼎與汪三奇龍墳劉醅  
驥皆與焉亂後棄舉子業築室白雲山授徒以老龍墳字夢  
先貢生官應城訓導以文名海內者三十年見文德翼雅似  
堂集

陳鴻恩王志作字大壑萬厯丁酉舉人歷官貴陽知府所至有

政聲後退居林泉手一編吟誦不輟以老

洪周祿字半石天啓壬戌進士常州知府解綬歸里肆志詩文  
行草書妙絕一時急難好施鄉里德之年七十餘卒

陳師泰字交甫崇禎庚午舉人累官蘇州知府告歸隱居樂道  
好吟詠書法直逼大蘇家貧問字者餉以酒卽用款客談論  
竟日年八十餘卒

韋克濟字孝忍崇禎丁丑進士授南安知縣以誠格巨猾邑人  
賴之丁艱歸遂隱居武昌賢庠鄉率諸子躬耕自給究心典  
籍與從弟克振以詩文自娛

李之泌字鄴仙諸生精大易宗法程朱不爲王弼京房之學絕  
意仕進以長桑術終其身嚴氣正性對卿士閉目袖手端坐  
不一語督學徵之不起興才人何履仕齊名時稱何李子孝  
迪孝种皆敦篤力學种善詩及書法

王一翥字子雲號補菴追舉子以父廕當得官不就嘗遊京師  
魏璫耳其名要爲記室一翥棄僕從閒道遁崇禎庚午舉於  
鄉國變後住廬山之智林村出入皆素衣某縣令者與一翥  
善縣有冤獄一翥入白之酬以千金掉首去不顧也歸寓郡



城之東所居村仍榜曰智林讀書其中家益貧所業益進文宗西漢詩本風騷天下蓋莫不知有王子雲者卒葬巴口之鳳山著有智林村稿

杜濬原名詔先字于皇號茶村祖若芝舉人官知縣父祝進舉人官國子助教世有隱德濬少慕張江陵之為人慨然有用世志崇禎己卯中副榜福藩擁立考試七省貢生因南下見馬阮用事朝政不綱遂絕意進取僑寓金陵改名濬年才三十餘耳負才跡弛意氣籠罩人江南諸老或出或處爭引重焉晚住雞鳴山之右城之僻遠處也益以文章氣節自勵貧不克舉火不以干人日列故人所贈湖毫沈水香梅花片三物坐其間陶陶然誦所為詩古文嘗謂文體壞於范陳詩體

壞於元白又謂諸妙皆生於活諸響皆出於老作詩力追少陵燈船鼓吹百韻長歌雖以此得盛名應是別調五言律尤高渾沈雄自名一家古文亦獨闢町畦睥睨一世年七十七卒越十九年湘潭陳鵬年守江甯始為營葬於蔣山北梅花村生平論詩極嚴於時人多所詆訶有富於財者重價購其集而焚之世傳變雅堂詩古文不及十之一二子世農字湘民世廈字柏梁世廈早夭所傳燕子磯懷古有鐵積千年石潮歸萬古痕之句者世農性孝友賦斷雁吟哭之目欲殮可謂至性過人者矣亦先濬卒世捷字武功亦工詩並見詩觀

先賢學行略參胡紹鼎撰本傳

案喻文鏊湖北先賢學行略云于皇有偶見詩選中昔年



仲兒世廈燕子磯詩驚歎淚下之作又有捷兒從江陰歸金陵詩云今秋喪汝兄顧黃公為湘民作斷雁吟序則云湘民哭其弟柏梁是于皇三子長世農次世廈又次世捷方望溪墓表云一子幼迷失一為僧遠方一世濟似誤

杜芥原名紹凱字蒼略號些山明季諸生與兄濬同阻亂寓金陵志行不殊而趣各異濬峻廉隅孤特自遂遇名貴人以氣折之於眾人未嘗接言語而著述滿天下芥退然一同於眾人與人語雖兒童廝隸惟恐傷所作詩古文雖子弟不肯示自評點而已其宏肆兀稟遇阨而氣益昌家貧而學益富與濬同後濬七年而卒得年同方苞並表其墓苞與兄舟故嘗從芥受業者也著有些山集參先賢學行略

官撫辰字凝之應震子少穎異博學精天文兵法以選貢授桃源知縣上治河需兵議當事不能用丁母憂歸總督徐標舉為真保監軍又擢徐州知府皆不起及閩粵諸藩聘之慨然曰天道不可違也臣節不可變也遂祝髮於維揚名德是又號知劍道人雲游名山谷利老歸黃居維摩堂卒葬其處

萬爾昌字師二一儁子崇禎丙子舉人座主吳偉業錄其減膳撤樂表程式多士名重當時流寇亂昌之武昌謁楚藩亟言防城不如防江為畫策不聽遂歸自是絕意仕進與兄里春弟爾昇爾景閉戶撰述相師友知府于成龍欲見之不可得遂安毛際可序其詩文以為大節在淵明閒而詩亦得其遺意年八十四卒著有頤莊詩文集頤莊隨鈔子為恪詳宦蹟



萬爾昇字退修爾昌弟爲諸生有聲後棄舉子業結廬武湖之濱顏其齋曰秋水岑兄弟師友一門之內雍如也共往來者自王一翥魏公韓數人外罕覩其面嘗論歷代史論互有異同得失參半著史求一書折衷羣言務求至當人爭傳誦好接引後進經指授者多成名卒年七十有四弟爾景字舒季諸生篤學尙節義亦以高隱終子燦詳文苑

曹大濩字尙白之棟子諸生生而偉異讀書厲節不求仕進善詩文工書法臨摹古帖甚富年八十餘鶴髮清癯蕭然物外士林重之子本復字剛來詩與書法亦有稱

魏澤霖字鶴山家貧嗜學讀書於湖山之一葦菴厭舉子業怡情山水少交游人多不識者從孫希聖亦能詩

王士龍字水簾工詩古文名藉甚以歲薦授潛江訓導及歸刈茅結廬遠近多請業者年八十餘卒同邑陳大章稱其逸才高節古之文獻爲序其集

汪國潑字漪公守廉孫諸生才敏瞻以詩名晚隱並阜山麓號阜山樵人魏公韓稱爲雲霄之上有其人麋鹿之羣亦有其人與王一翥萬爾昇輩同以氣節見重一時著有樂志齋稿樊維師字尙父少負逸才詩文下筆立就宏光時由附貢任淮安推官一時名士多與游後歸田結廬寒溪側吟詠以老

蘄水縣

李子賢以孝聞持身醜謹平生無媒褻語以山水自娛鄉里重之



程在霄性矜嚴好古籍謝絕賓客每呼童子挾卷隨步吟詠晚號孤山樵隱

柴大楠磊落英奇弱冠棄家遠遊塞外涉混同鴨綠諸境晚歸傍巖臨溪築一室廣不盈丈隱居四十餘年讀易老諸書足不出戶

程文遠字尚質正德時歲貢生不樂仕進嘗於林泉勝處築臺自娛有詩云泥塗風雨怯沾衣臺築荒園祇自宜竹放靈根封砌穩樹披清影下階遲湛若水題其臺曰樂壽號以訥菴贈句云天下方多巧訥菴原不知菴中人默坐兀兀到皇義畢良凱嗜古多著作以春秋名世黃士夫多宗之嘉靖閒舉明經不仕生平恥干謁邑令慕其賢每造訪焉

柴杰博學有隱德嘗坐竹林中讀書竟日於書無所不窺尤精於易與兄木友愛最篤析田廬為四一子與三姪均每戒子云知事宜少識人毋多餽粥外有餘則去之不可以田產累子孫也

黃可久字柳溪初為武昌諸生甘貧力學與妻偕隱臙脂山下精丹經內典醫卜諸書每瞑目默坐自號出塵道人歷游名山後歸老於湔築室沂流光之濱居之子正色詳文苑

楊伯浩字洪宇萬曆時人邃於理學辟舉不就後絕跡城市知縣杜長春游王廷皆敬禮之

麻城縣

甘望魯幼為人牧奮志攻苦研窮程朱之學卒成名儒以黃陂



有二程子望魯臺因以自號縣志作元人

董紹號明山以明經考選不樂仕進暇日登山臨水徜徉忘歸

留心著作因家世冠裳謙謹過於石氏子樸詳宦蹟

李瑞字白岡食貧好古不慕榮利與同邑劉尙書采為莫逆交

萬歷初建縣城照糧里輸工瑞親操畚鍤往役焉劉尙書適

致仕歸以老友從役特入城省之瑞役作自若不顧也

劉秉鑰號三韋萬歷乙酉舉於鄉授長史挂冠歸里築室東山

研究易理足跡不入城市三十餘年善草書晚年目暗揮灑

如故

朱家亨字太宇清操不苟萬歷末詔舉賢良遺逸備詹事府用

有司以家亨應不就焚香課讀以壽終

周振字若臨應嵩子萬歷己未進士值天啓朝魏忠賢用事遂

不赴選歲時伏臘每樂與田夫共飲温温穆穆不知其為軒

冕中人鄭仲夔冷賞

梅之煥字惠連國楨子博涉羣書頡頏海內名宿明末亂起棄

廕襲散家財歸隱囊山為僧別號槁木以著述自娛祀鄉賢

案之煥常與三吳復社諸子主盟文壇馳聲海內國變後

北行上書請葬莊烈帝歸隱囊山地極幽僻晚且祝髮披

緇纊衣糲食以終其身著有春秋因是萍廬史論等書子

坳克承先志縣志

黃安縣

孟論堯字紹唐諸生博通經史與族人論性講明理學宗旨論



性字原仁幼聰穎讀書過目成誦偶倣木牛流馬遺制造小  
牛能自走長益好學從耿定向兄弟游淡於仕進蓬華蕭然  
定向貴顯無隻字通問晚年定向致仕造廬道故蔬菜糲飯  
歡留竟日定向歎息而去

趙文淵字海岳少有卓識嘗讀史歎曰物滿人概人滿天概今  
海內不見兵革久矣生齒日繁陽氣太盛殺氣殆將開乎遂  
偕妻陳氏預避於石門山中後果有闖獻之亂文淵著有南  
華新解訂訛諸書

韓勳字欽父崇禎乙亥拔貢生不屑俗學獨肆力於五經諸史  
明末隱居教授生徒數百人嘗謂王通以禮樂屬弟子無有  
受之者卒成開元遺憾作撥正諸書以寓王道年八十餘卒

孫名世詳篤行

周世鎮字元樸諸生以恩廕補太常典簿尚書葛屺瞻侍郎張  
元始皆器重之引疾歸鼎革後年尚少耕鑿山林深自韜晦  
國朝徵賢良遺逸大吏交薦復以疾辭晚年益精性理諸書優游  
林下以老

羅田縣

唐友義鄉薦後不上公車棲遲衡門屢辟皆辭自號多雲老叟  
年九十餘卒祀鄉賢

匡琳玉廩生本姓方正學先生裔孫素有大志甲申之變思陵  
殉社稷琳倡義勤王既知事不可爲北向拜哭解其眾遯跡  
深山晚年自塑遺像至今猶存



黃州府志 卷之二十五  
蕪州

袁信讀書敦禮聞義勇爲嘗以便民事陳言於朝特旨俞允錫以爲善陰隲孝順事實二書歸隱年九十八無疾而終

朱紳字懋孚平居自食其力田間耕牧卷冊相隨憑弔古今慷慨激烈時人莫窺其際

盧楷字汝端才識過人少應童子試輒不利改就臬掾年四十以親老乞養給告身爲州祭酒隱居於鄉築園亭濠上當道數禮聘之固辭不赴年七十七卒孫絃詳儒林

陳侯周字舜生諸生父病割股以療妻死不再娶明季棄衣巾袒褐芒鞋遯於山澤以壽終

廣濟縣

胡瞳字必暉諸生少聰穎爲詩古文下筆有奇氣洪武二十五

年詔秀才隨詹事府左春坊分班直文華殿侍講瞳應選赴京就職靖難兵起拂衣歸子孫三世皆不仕

柯仲立號半山孝友博學作半山書舍聚一時文士講論經義窮年不倦後移雨山號兩峯居士

程希關沈酣典籍素以古人自命搦管爲文詞頗類莊騷嘉靖辛酉舉於鄉屏跡深山力敦內行以終

劉賓號溧泉隆萬間隱居講學與吳自守陳王道友善知縣劉允昌稱爲卓隱先生子三養微養吉養度皆以詩文名家養

微詳文苑養吉詳孝友  
劉秉錄字昇之事孀母孝母卒哀毀骨立年四十喪妻不復娶



有僕久役於家聞其先為士族焚契遣之隱居授徒以歲貢終于洪芳號芝圃亦歲貢生詩文早歲有聲嘗游吳與長洲諸名士飲酒唱酬四座傾倒孫醕驥詳文苑

徐來寵字玉吾博學善諧晚年為隱士服芟茅赤土山下顏曰蚓可齋友至自起烹茗備雞黍其子請代輒麾去曰吾自適志耳書其楹云灑掃一室以待死破除萬事以延生

吳人玉字穉圭諸生性至孝為文淵古浩博著述甚富絕意仕進善卜筮預知吉凶年七十自置棺題曰逸我亭

楊勳一名大勳字介子明末廩生甲申後蓄髮茹素為道者裝與四方緇徒往來有勸其赴貢選者不答而去

黃梅縣

商顯雅好詩書永樂二年徵聘至朝固辭不仕賜號樂耕徵士

翰林張和美作寒江歸隱圖題詩送之有畫圖不盡寒江意

千古高風一釣舟之句

石維屏諸生結茅山中讀書砥節薦舉德行堅辭不就

汪淮宏治間兩為社學師屢膺義辟力辭不就

王宗憲由選貢任灌陽知縣嚴正自矢不阿當路蒞任八月掛

冠歸脩然自得毫無愠色

程仲魯字少愚布衣高尚慕邵康節之風常乘小車出入載筆

牀茶竈吟詠自適刻有東峯外稿

汪美號勉齋仲弟勳號逸齋相繼入庠皆負奇氣試輒高等食

廩餼當歲薦時勳名次先美不就曰某弟也不可以先兄美



黃州府志卷之二十一  
磨薦亦不仕作見志吟名其亭曰省心季弟灼字竹菴幼不能詩中年究心內典久之不假思索輒成韻後勳子可受貴勳乃迎其兄與弟共居樂志亭年皆六七十餘更相唱和著有怡怡堂詩集可受詳宦蹟

蔣文字素公崇禎壬午舉人遭世亂不仕住烟波深處每得魚卽欣然賦詩嘗曰昔人投錢飲水吾以詩易魚亦不薄其值矣弟昶詳宦蹟

余振遠字宣臣增生德器深沈明末屏跡烏鴉山下以詩酒自娛賦詩云雲山千萬疊茅屋兩三閒未了詩書債重來補聖賢著有安溪詩集

李芬字應秋諸生端謹自持荆王屢辟府屬弗就後以師禮徵

應之期年稱疾歸賜陶家圩田百畝不受晚遭流寇建峇龍頭山于五俱知名

國朝

黃岡縣

胡來通字安吾年十二有僧見之曰此人閒百歲翁也性好施與明楚撫魏光緒會表其廬順治十七年壽百歲僉謀建坊來通力辭之忽一日沐浴更衣端坐而逝孫二珙諸生好學工詩金聲譚元春嘗序其集珠詳忠義

余師皋字迪甫諸生積學邃養多所著述明末流賊亂手錄無一存者隱居龍岡山中子世羽舉人瑞安知縣有清白聲錢材海字會川簡默端嚴讀書城山龍泉寺歷數十年罕與外



黃州府志卷之二十五  
接通易理兼工顏柳書法孫兆清諸生能世其學著有自怡齋詩鈔

蕪水縣

詹樹字宜振能詩文工畫嘗作三峽圖黃岡王侍郎封滌寶之華亭名宿吳樊桐昌祺館滄上屬作長江圖黃鶴樓圖稱爲絕筆然性孤介聞公卿召輒匿走年八十餘卒

李根字美發工書能詩隨分自甘無求於世酷嗜竹石因以名齋詩見同聲詩選

吳振起字卿雲博極羣書性好游窮涉人跡不到之處每遇斷碑殘碣剔蘚剝苔務求源委嘗夢見宋郭君錫墓銘蔡襄筆次日尋其地悉與夢合作書室於蓮塘之上顏曰泊艇著有

梧齋詩文八卷

周起瓚字玉臺癖潔性成簡於應對嗜古名畫圖書尤嗜硯嘗作百磨硯銘字法顏真卿李西臺詩類徐文長而幽峭過之居蘭谿上有宦家子知其名敦請爲師卽夜匿走

麻城縣

劉淑頤字百年幼倜儻有奇才徧游海內所如多不合歸隱於龜峯沈波草堂沈尙書德潛嘗選其詩入別裁集

梁中斗字季昂歲貢生少以李鄴侯自况數奇不遇隱居鳴山之谷口莊著有雪亭詩集

梅鳳藻字丹山少穎悟多聞爲文雄傑人皆以大器目之中年絕意進取教授生徒流連詩酒著有香雪樓詩集晚居邑北



萬壽集之龍門河自號龍門山人

黃安縣

趙光早字爾昂好讀古書不屑爲舉子業高臥山中三十年不入城市自號蘧蘧子知府于成龍招之以疾辭著作甚多年八十餘卒

彭之夔繩祖孫諸生康熙丁酉鄉闈擬元數日卒置副車遂謝場屋授徒山中知縣張琮耳其名延之不至造其廬避不見張徘徊久之曰今泄柳也袖其所注易以去

羅田縣

蔡容遠涉獵羣書長於古文所撰誌銘膾炙人口一時藝林若張思明劉繼元胡來賓胡節張大鳴張人鵬蔡芳輩日與講

學不輟惜皆淪落不遇著述罕傳

蘄州

顧景星字赤方號黃公明選貢生曾祖闕祖大訓父天錫皆以文章氣節高自標揭景星母明孕十三月而生生之夕巨蛇蟠屋上光色熒異父夢星降於庭形如半月占曰是謂景星因以名焉三歲尚不語一日語忽述彌月及前生事甚悉歲饑有司元夕張燈家人衣以彩襦憇往觀戚然曰何不以此賑饑吾不願往六歲能詩八九歲讀經史目十行下卽著有詩文一囊稱聖童熊文燦挈張獻忠等十餘營降賊過蘄荆王止賊首飲走馬後苑縱寵姬觀之爲戲景星年十六聞之急謁知州唐世照曰熊公不得死所矣獻忠於諸賊中最黠



不早除之有後患奈何不為備反令此輩得窺王宮虛實耶  
崇禎十六年正月賊屠斲景星與父俱被執於賊前爭代貞  
節姑劉死賊義之得免展轉流寓之崑山南都擁立試流寓  
貢生景星名第一授推官隨上敬陳四事疏詞旨剴切通政  
抑不上遂歸崑為長隱計

大兵下崑山多羅貝勒命以原職隨征辭養歸里康熙十七年舉  
博學鴻詞以病辭

詔咨送來京入覲

保和殿再以病懇放還殿門著述顏其堂曰白茅取易無咎之義  
詩文恢博雄悍自詭不讓古人兼通六書之學著有白茅堂  
集黃公說字等書崇祀鄉賢子昌詳文苑先賢學行略參文  
獻徵存錄及李炳

然撰  
本傳

李具慶字亞白樹初子明諸生博覽多通值獻賊陷斬全家殉  
難具慶被創僅乃得免鼎革後屏居湖濱絕意進取江防道  
呂陽延入雲門社與晏東白華二華主盟文壇殷殷以誘掖  
後進為己任著有芸香草荷汀集諸書

廣濟縣

陳定中字大馬明季棄學籍隱於醫結茅於湖曲柳陰中竭力  
奉母以耕釣終其身

呂楚奇字正孺篤志好學守正不阿見少年猥薄者必正色讓  
之年四十絕意功名自號汰沃山人與鄉之能詩者結霞石  
盟分韻聯句自夜達旦知縣王名世以賓筵請固辭獨策杖



山水閒與父老談世外事年八十二端坐而逝

黃綏字人長少穎秀值寇亂廬舍火故人賈任啓建牙於江西往依之歷諸帥幕府稱上客倦遊歸結茅龍坪授徒里中得錢輒治具延客酒酣賦詩或潑墨爲蘭竹書效歐陽率更體年八十卒

胡懷玉字楚瑛少喜遊俠長折節讀書不慕榮利初隱於醫復隱於酒家有大匏可注一石賣藥沽酒注匏中顏其居曰匏齋自號匏叟客至出匏飲輒醉輒高吟或枕匏臥臥起索筆直書自古近體以至填詞小令往往雜出蓋又隱於詩云

黃梅縣

洪樞字文宿諸生博學能文流寇陷城後歸隱湖濱或勸其應

試以疾辭杜門卻軌飲酒賦詩年七十一卒

吳世理字宜三 恩貢生性伉爽遇友難輒以身赴博通今古除教職不就隱居太白湖年八十六卒

吳履字綏公廩生嗜古力學斷簡殘篇不惜重貲購致一一手錄邑志燬於兵順治時知縣徐昱親謁其廬得手鈔數卷藉以按輯顧淡於進取一試不售退隱湖濱著作日富及歿黃利通曾達有詩輓之

石室字書牀號秋水嗜古好奇雅不喜舉子業所爲詩悲壯蒼涼兀傲自喜家貧好遊嘗浮漢達湘登天柱祝融最高頂歸而詩益奇崛築室林泉日與名流相倡和喻文鏊亟稱之



藝術

唐

黃岡縣

道泓幼為沙門與天官侍郎張敬之厚善所言吉凶無不驗嘗為張說相宅見東北隅有三坎丈餘泓曰公富貴一世而已諸子將不終後說子均埒俱以汙安祿山貶斥死

宋

蘄水縣

龐安時字安常家世業醫父授以脈訣安時曰是不足學乃讀靈樞太素甲乙諸祕書旁及經傳百家為人治病立愈有婦產七日不下安時令以湯熨其腰腹自為上下拊摩有頃子



隨手墮詰其故安時曰兒出胞手執母腸吾捫兒手鍼其虎口即縮取兒視之右手鍼痕存焉蘇軾謫黃聞其名乘籃輿訪之與語甚相得安時少患聾以手畫字即解軾嘗戲之曰余以手爲口君以眼爲耳蓋一時異人也

詳宋史方伎傳

廣濟縣

程小八善茅山法能役雷霆風雨

元

黃岡縣

葉如菴儒醫診視有方撰傷寒大易覽一編爲時所宗

麻城縣

樊子晉讀書明理審病察脈預知人十年生死醫家宗之

明

黃岡縣

陶仲文初名典真少喜方術嘗受符水訣於羅田萬福敦與邵

元節善嘉靖中由黃梅縣吏爲遼東庫大使秩滿需次京師時元節得幸年老宮中黑眚見治不效因薦仲文以符水噉劍妖遂絕莊敬太子患痘禱之而瘥帝深寵異十八年南巡有旋風繞駕仲文言主火是夕行宮果火帝益異之授神霄保國宣教高士歲餘進封真人明年以祈禱卻疾功特授少保禮部尙書尋加少傅仍兼少保帝自二十年後遭宮婢變移居西內日求長生君臣不相接獨仲文得時見見輒賜坐稱之爲師而不名旋以獲大同謀者王三功加少師仍兼少



傅少保一人兼領三孤終明世惟仲文而已二十九年春災異頻見仲文言有冤獄得兩方解時都御史胡纘宗下獄株連數十人爰書上帝悉從輕典果得兩乃以平獄功封恭誠伯歲祿千二百石仲文得寵二十年位極人臣然小心慎密不敢恣肆三十九年卒年八十餘帝聞痛悼特諡榮康惠肅

隆慶初追奪秩諡

詳明史

宋子京學舉子業不售去而學醫久之心志開朗一望知人病源有巡道無他病但不能食郡守薦子京往子京曰且無往試俟其出觀之巡道出子京從輿上望見之乃敝衣冠垢汙而進巡道怒次日病愈呼子京詰其故曰昨日垢敝乃醫公者也公平生常得喜病一怒而喜自消又見昇棺者漏血一

滴曰此可生也問之則婦以難婉死呼其夫開棺鍼之婉一男母子俱全視郡守脈謂十年後當領西南節鉞然必墜下頰至十年撫蜀果病且兩月邀子京治之至署交拜以手掖撫軍起而下頰已上矣

甘霖字時望少嗜河洛奇門禽星之學遇奇人授以太乙六壬皇極範圍周易大定諸數後謁武當宿紫霄宮又得終南無礙師元養接命之祕形家之術常聘贊幕府平播酋平島夷屢犯虎口卒獲全陳繼儒謂霖忠孝填胸精神滿腹關中張儀仲刻其所著五種祕竅全書謂根柢儒理非楊曾廖賴所能頡頏云

蕪水縣



易坤字本厚少業儒善吟詠尤以醫名成化二十一年應取至京補太醫院醫士不競時好人多重之

楊先春膂力絕倫有大盜劫其家先春舉石磴盛茶飲之盜驚去又嘗遇盜先春曰我與若校騎射可乎乃揚鞭走馬衝突樹下以手抱樹雙足夾馬懸空中盜大恐而去會蘄州紅旗賊起駐羊角尖當事檄先春督勦拔樹為梃擒其魁賊平復隨征麻陽洞有功予以官力辭不受

案王志入孝義今依通志移入

麻城縣

蔡密得茅山法呼風喚雨驅鬼役神奇幻莫測密後傳縣人謝龍龍傳汪炳炳傳陶仲文其法益顯

宋有章習道法能以符呪治病嘗濬池得一古銅印篆刻蔡密

二字用之其術益進比縣亢旱三禱三應徒仰止亦精其業曾震字飛伯出遊襄鄧間遇畫師陳某盡得其法而於寫真特妙達官貴人爭延致之

通志

歐陽方且字旭之諸生遇異人授以太乙數每課吉凶無毫髮爽甯南伯左良玉徵入幕欲授以官辭不就

黃安縣

彭長溪精醫善用鍼石一日道中見一男子問曰常患脇痛否其人曰然長溪曰腹有蛇將嚙汝肝吾為鍼之鍼入囑勿動約七日來此如期至長溪曰蛇已死可去鍼三日蛇自腹中出首已腐矣

耿興儼字鐵山善畫馬作山水尤工

通志



劉秉德字均粹博通醫家書一日入城遇瘞小兒之以痘殤者曰可活也乃置尸井旁汲水注之俄頃兒嚏遂活有貴人目中見鏡形乞治秉德邀過其家既至几上置醢一楪秉德入內久不出貴人渴稍稍飲且盡劉乃出曰見鏡乎曰無矣劉曰君善飲醉食魚鱗黏肝故致斯疾也乃歡飲而散通志  
陳志明字養晦習岐黃苦於術之無奇由是北遊燕薊西入關中東至白下南涉湘沅徧謁名師遂得其要於傷寒陰陽二證汗吐下三法尤精

張昌張清兄弟也皆力能碎石斃虎捷若猱猴未建邑時里中多盜聞盜即往救後先斃盜百數盜魁恚甚佯為結好陰圖之一日折柬招昌飲清曰不往示弱往恐見害昌曰往哉汝為吾續昌至羣盜出迎皆如猛獸奇鬼狀昌南向坐盜列兩行前擁十餘席盜魁曰聞公高藝試觀可乎曰諾眾方屬目已飛越十餘席立墀中北向矣會清亦至遂攜手去羣盜股栗裔孫有正甫者傳其槍法能敵二十餘人盜不敢犯

羅田縣

萬福敦少為僧知縣徐泰召與語大器之命蓄髮訪道四方號玉山善踵息修鍊旁通風角堪輿奇門符水尤聖於醫其他繪畫譜琴擊劍蹴踘躡躑雜伎種種入能品語人禍福多奇中人問以故曰太清無纖雲誠則明矣年六十始娶生一子正德十五年遊霍山謂主人曰靈鶴且夜至倘余假寐幸亟呼出戶也是夜風聲驟起瓦甍皆鳴主人驚出見羣鶴集竹



黃州府志卷之二十五  
稍仆壓牆屋呼玉山不應入戶覘之則正襟趺坐逝矣年九十二嘗以術授陶仲文仲文貴上詢其師贈福敦爲真人萬全字密齋廩生潛心醫學尤精痘疹一日於鄉先生家適見兩新婦不及避全語主人曰此皆未痘痘將出矣一可救一不可救越月果如其言又有患痘者死已半日全視之令置汗泥中三日痘復發藥數匕而蘇有豪少年佯大病重幃密室呼全診視全曰越十五日當死不必藥也少年掀幃叱之曰我何病聊試汝耳全曰診脈如此至十五日果死  
余某明季諸生宦遊四川嘉定州靈雨連月州牧建齋醮祈霽雨如故咨於余答曰久雨陰盛當宣幽出滯君得毋留獄乎乃清其訟牒百餘出沈獄十餘人又令選童男四十八人衣

赤衣執紅旗向南方鳴金鼓以宣之次日果霽

蘄州

龐憲字鹿門幼從名醫李時珍得其學有客耳聾就憲診視曰胃火也客曰耳屬腎與胃何涉憲曰君未知素問靈樞耳胃經絡起於鼻上過於耳旁或於食時則聾更甚一七而愈州守夫人病瘧診之曰此瘧勿藥有喜但過十日當下血夫人不悅越十日果血下亦一七而愈蘄多名醫如張慕愷韓泰陳泰李言聞嚴政郝守道之屬皆有聞於時  
浦心韋荆藩良醫精太素脈通風角鳥占每診疾斷人窮通壽夭百不失一用藥多立效後以壽終

顧氏耳提錄

廣濟縣



黃州府志卷之二十五  
胡獻琛字克忠幼業醫以疾求治者輒效有饒秀才病酒伸頸  
期期不能出一言久之無聲獻琛曰是火在經絡也投三劑  
而愈萬厯癸卯邑大疫製藥活萬餘人年八十三卒子懷玉  
亦以儒醫著詳隱逸

蔡紹夔字惟益精醫理荆王患痢聞夔名召之數劑而愈王贈  
額曰醫冠楚黃後過蘄王問曰先生欲富貴乎對曰富貴非  
吾願家有薄田數畝子孫耕讀最足樂也王益重其品年逾  
七十面色如兒童至八十餘卒

朱顯綬字熙菴少有隱德喜讀書尤深於易精卜筮常學丹術  
於王雲鵠登樓設榻足不履地者數十年自是解觀天象知  
世變避亂江濱人士多依之

案王志隱逸方伎俱載此人今依通志歸入藝術

國朝

黃岡縣

胥秉哲字匡生家世業醫嘗游吳會燕豫閒遇沈疴投劑卽痊  
有徐某妻孕而疾延診脈曰倏隱倏見尺中有神非癥非痞  
結爲狐形以藥投之果產異物其中丞夫人病歿將殮秉哲  
至望氣色謂可活乃就棺藥之須臾聞聲息竟獲甦王方伯  
女患痘已死視之曰生氣猶存藥之卽起著有診法精微等  
書後徙居江夏

袁黃琮字三山精於畫理嘗畫觀音像安國寺僧戒顯視之曰  
筆已通神可留寺中供養然不久存人世也未幾禪堂火眾  
見畫像衝煙而去其徒汪欒正亦能詩畫得其祕傳



索震字獻子工隸書善寫墨竹風致瀟灑鐫石法文三橋其外  
孫徐元士傳其法頗稱能品又諸生王如琮篆刻亦蒼秀  
方可發字適成貢生能詩善繪事以畫梅著名得楊補之梅沙  
彌不傳之祕曾寫老梅一株勒石於赤壁坡仙亭

易洪周原名德溥以字行精岐黃業雍正七年怡賢親王以疾  
徵之進藥立效

世宗憲皇帝召對稱旨授禮部主事卒於官時蘄水人周廷楹與洪  
周同徵廷楹有至性以葬親乞歸然兩人在蘄黃閩名最著  
邵光祖字可樓乾隆辛酉拔貢學純養粹尤工書法神氣流貫  
骨肉停勻駸駸乎入二王之室矣所遺真蹟悉箴規名言識  
者寶之

曹昌曉字耀勳本榮嫡孫學植淹博真書章草均法董文敏後  
有曹善字復堂漢陽籍亦本榮裔孫工八分篆籀皆擅時譽  
劉之鑾號雲亭乾隆甲寅舉人嗜學善屬文尤工書畫書摹唐  
碑晚益蒼勁畫法倪黃著墨不多而神韻自遠

張利川號星槎國子生少秉異資屢困場屋遂棄舉子業留心  
圖史旁及雜流善草書得米南宮筆意尤精卜筮占驗多奇  
中晚客吳下求書者盈集年九十餘歸老於家

涂治祀字己山諸生工書法自成一同時有李濤者自號青  
虬道人善丹青有馬夏遺意涂書李畫一時並稱

李之蘭字玉階增生積學工書得王夢樓筆意姿態橫逸同里  
諸生馬光烈字斌臣書法顏柳兼工繪事名與之蘭埒



高序奎善風角星象占卜多奇中常手周易一卷眉批縫注皆  
徧書凡數十更嘗於居室側作小渠僅容斗水人問之曰偶  
作劇耳數日鄰舍火而奎居如故又嘗突入鄰家促臥人起  
梁旋傾直碎其牀居恆室內几席多參差置之作奇門式盜  
不得入晚年遁去不知所終後有徐習功者亦精風角壬遁  
諸術粵逆竄境知縣翁汝瀛葛致遠先後督鄉兵招習功占  
勝負無不驗

蕪水縣

嚴楚璧目雙瞽康熙閒以星卜名海內本省巡撫某夫人將產  
問之曰弄璋耶瓦耶楚璧屈指算曰璋也弄瓦也弄果產一  
男一女由是公卿交聘始無虛日

許續會滇  
行紀程

徐儒桀字季方由供事授典史穎悟能文尤潛心醫學居京邸

公卿倒屣迎所診治皆愈著有傷寒正宗四卷

周文煥精易數卜筮多奇中晚年過英邑遇異人所言益不測  
同治三年年七十二函詩與諸子有清風明月任遨遊之句  
遂長往不知所終

麻城縣

曾鎮隱居柏子塢石洞因號石洞道人畫山水筆墨蒼老鶴髮

藜杖籜冠羽服望之若仙劉侗嘗爲序贈之卒祀鄉賢

曹悫號素菴幼通經史不遇遂以畫名畫馬畫雁尤工薦紳家  
多珍弄之

鄧履寬業岐黃尤善書畫寸牋尺幅人爭寶貴



彭文楷字端軒別號旭陽山人善醫農某患腹痛劇諸醫束手楷診之曰脈大小無定脣朱面白此蛭入腹也用田泥水飲之果下蛭千百而愈其治病多以意創有方書未載者

### 黃安縣

李文軒順治初嘗從山僻閒得素書一卷砭鍼數枚鐵馬勒一具遂精馬醫巡撫林公聞之召試其術有馬孕數月軒曰當產黑駒已而果然邑紳有愛馬病令視之曰爲我具雞黍已而取雞腿二納馬鼻中須臾出蜈蚣長數寸許馬遂愈

韓五公子者兵部職方司庚寅季子也生而聾且啞父教之識字能摹樂毅論見者以爲神肖有武力徒手可敵二三十人雍正閒歲大祲富室吳某家近河南有流民將行劫吳延韓

衛之盡逐流民去及歸有十餘人以棒尾其後擊之棒未至

碎爲兩段一人斷右臂餘皆遁

通志

楊重華王子甯彭仁池三人皆瞽目楊以手相馬牝牡年齒毛色德性歷言不爽王善攻木運斤自若彭以星學自活而遠行不用相一日憩五里山旁失錢十七枚既歸仍往原處尋得之皆異人也

通志

### 羅田縣

廖國遇自號遂穀老人善書法嘗避兵蕭寺得衲子衣服之敲木魚唱梵唄賊突入問和尚以何術過活漫以字傭對賊未信裂紙立揮數幅羣詫爲奇僧竟舍去因篆其章曰半僧復一日病臥自言有人召作字戒家人勿遽斂遂昏絕累日始



蘇由是晚年書款更號又蘇

蕪州

徐琮字侶蒼一號顛客精六書之學金石刻具有法度亦工詩畫與長沙陳鵬年相交善同里有方舟者工畫草蟲尺楮寸

幅人寶貴之王志入隱逸今依通志移入

鄧元縉字霞素善丹青與徐琮同師黃樵長徐精山水鄧工花

鳥及寫真陳大章玉照亭集

郭從字層崖承恩孫諸生性嗜酒豪爽不羈喜讀秦漢書工書畫尤精古篆至今寶其流傳圖印如韓陵片石不可多得所作詩見雨湖吟社合集原名從後改從故號去山云

黃軒字著南畫花草人物工細異常江南文士雅愛慕之向與

陳瑗同師鄧元縉陳亦楚楚有致

王恕號蘭渚善畫山水人物品高神足率以大劈斧帶水墨皴為之蕪以畫傳者鄧霞素黃著南而後此其接武也

廣濟縣

藍生挺字是效諸生好形家言讀書有得則徧歷前朝兆域以自考驗吉安守趙某延為上客先是宦是地者多齟齬以去生挺指署中某物宜添某所宜去又安福科名寢衰生挺與令步學宮傍使人掘得古溝謂令曰開此溝科名復盛矣是科捷鄉闈者五人趙亦陞僉事去存實堂稿

閔貞字正齋父德裕工形家術與母程相繼卒貞年始十二比長欲圖父母像奉之遂極力學畫藝既成為人傳影皆酷似



而父母像終不肖一日遇田叟於塗儼然其父也延至家飲食之陰摹其度態又數年見丐婦宛如母狀乃合而圖之懸之堂中見者以爲如生嘗游藝都門王公貴人爭相推重題其所作奉饌圖皆稱爲閔孝子 通志

黃梅縣

程萬藻字匡汝精青烏術嘗游潛霍英六爲金尚書光悌祖父營葬預卜當福某支干所生人果驗卽尙書也閩邑謀建奎星閣請藻擇地閣成是秋捷鄉闈者九人僉以是德藻藻曰適然之數也

陳文斌字武烈精醫術立起沈疴貧窶者不較藥值常置夜燈以照人行一日視病遠方晚歸中途遇雨昏黑不辨路忽見數丈前燈光隱見若近若遠直達里門則門前照夜之燈也著有傷寒纂要諸書

周金樹字貫亭工書法能作望雲草書梅自喻化鵠石謚後金樹其傑出也與蘄水王雲廣濟徐襄同時以字名家人爭寶貴又善勾股算法著有算法精言

胡嶼字龍光精繪事著色鮮明歷久不壞畫瀟湘八景於山市晴嵐洞庭秋月能空中起色山寺晚鐘亦象外傳神師法閔貞其外祖也嘗爲喻文整畫黃梅出山圖極工見考田詩話補遺

黃岡縣

許傳德字聿修 恩貢生居城南棲鳳窩卽東坡所稱古氏南



坡地因以南坡自號焉博學工文辭尤善書行草得南宮三昧喜作擘窠大字人爭弄之著有音韻源流攷毛詩音義補史腴摘論南坡詩鈔等書

邱翔字翼臣道光庚子舉人工制舉文字試輒冠其曹兩試春官俛得仍失遂絕意仕進歎曰身為士遂不足康濟人耶乃專心醫學自神農本草以下諸書靡不畢覽已而治病皆立愈風雨寒暄有請必往病痊概不受謝鄉居獎掖後進尤矜恤族戚貧苦云所著傷寒辨論二十餘卷實能發明仲景之蘊又濟世金丹如干卷

遷寓

漢

黃岡縣

周仁周平王次子汝墳侯烈十八世孫西漢時徙居黃岡繼烈

封侯其後以避西晉亂復他徙至周靈起仕梁王注案唐宰相表周仁

當漢時封汝墳侯後徙安成傳五世至汝曹揀燕燕九世孫防防十三世孫靈起其先世避西晉之亂徙居永安黃岡是徙自晉世者當為防之後人周仁封侯地則汝墳時則漢代並無徙居黃岡事諸志似失考存以傳疑

三國

麻城縣

毛玠字孝先陳留平邱人玠攜幼子家於麻城有魏武手書萬

古高風四大字迄今子孫珍藏之王注案毛玠卒於



南北朝

廣濟縣

徐儉一名報東海郟人陵之子幼而修立勤學有志操梁元帝召為尚書金部郎中累官御史中丞隋大業閒子斐授廣濟令儉來就養遂留居西郊

黃梅縣

鮑照字明遠東海人文辭瞻逸古樂府尤迥麗劉宋義慶時與太尉袁淑吳郡陸展東海何長瑜並著才名宗藩臨海郡王子頊鎮荊州以照為前軍參軍掌書記因築室於黃梅今邑治基即其舊宅有讀書臺在廣濟東衝山

唐

蘄州

李泌字長源京兆人七歲能文天寶中詣闕獻復明堂九鼎議得待詔翰林仍供奉東宮因賦詩譏誚楊國忠安祿山等國忠嫉之詔斥置蘄春郡

五代

蘄州

陳曙蜀人嘗舉進士唐末遯跡蘄山室中惟一榻素書數卷與蛇虎雜居雨雪滿堂自若也數十年顏鬢不改後徙鄂渚不知所終

宋

黃岡縣



韓琦字稚圭相州安陽人兄琚天聖間守黃州琦從之寓安國寺讀書白晝青燈風雨無怠後登進士仁宗時入相封魏國公諡忠獻黃人想其德望為立祠於讀書處

蘇軾字子瞻眉山人嘉祐二年進士元豐二年知湖州言事者摭其謝表語為訕謗謫黃州團練副使本州安置攜子邁寓居定惠院遷臨皋亭故人馬正卿為守從請故營地東築雪堂以居自號東坡居士與潘大臨陳慥王文甫游往來江上著赤壁兩賦嘗夜至浠水醉眠溪橋又渡江至武昌遊西山寒溪題詠甚富將買田沙湖以老尋量移汝州去

秦觀字少游高郵人元祐中為祕書省正字工樂府與蘇軾相友善紹聖初坐黨籍出判杭州尋以御史劉拯誣其增損實

錄削秩編管黃州

張耒字文潛淮陰人弱冠第進士紹聖初坐黨籍謫監黃州酒稅徙復州徽宗立起為通判黃州召授太常少卿復出知潁州汝州初耒在潁聞蘇軾訃舉哀行服言者論其罪遂貶房州別駕安置黃州耒凡三至黃士人就學者眾

陳過庭字賓玉山陰人中進士第宣和二年為御史中丞時方臘陷諸州過庭上言致寇者蔡京王黼竄二人則寇自平又言朱勔父子皆刑餘小人竊取名器罪惡貫盈宜正典刑以謝天下由是大與權貴忤陷以罪罷知蘄州未半道謫海州團練副使黃州安置

龍仁夫字觀復江西永新人文學與同郡劉詵齊名而尤深探



濂洛關閩之旨所著周易集傳十八卷多發先儒所未發初  
薦署為江淝儒學副提舉未就後仕為湖廣儒學提舉鼎革  
後授陝西儒學提舉不赴遂僑寓黃州益博究經史以道自  
任舉陰陽律歷靡不研究與西山吳應澍參政董敬中及鄉  
里草廬吳澄相友善擇孔子山之勝築書室於其麓以時講  
學明五經為時矜式學者稱麟洲先生嘗過潯陽呂文煥遊  
琵琶亭令賦詩仁夫即席賦曰老大蛾眉負所天忍將遺憾  
付哀絃江心正好看明月又抱琵琶過別船呂大慚晚愛陽  
邏山水之奇時一登覽特於江側磯石上大書淮甸上游四  
字以識之年九十餘卒即葬陽邏華山之陽學者建祠祀之  
子孫遂世家於黃云

右傳載問津書院舊志與江西吉安志合但考姓譜及一  
統志楚通志皆謂先生元人姓譜謂仕為湖廣儒學提舉  
一統志謂授陝西提舉案度宗九年二月呂文煥以襄陽  
叛降元十年七月帝昞即位十二月陽邏堡潰沿江諸郡  
皆呂氏舊部曲望風款附呂氏為有宋國賊先生詩所謂  
遺憾哀絃琵琶別船蓋以視老姦之魄而聲討賊之義也  
築室問津僑居終老安得復有屈節事元之理蓋先生仕  
宋為儒學提舉陝西提舉必元所授未就者嗚呼北戶傷  
心西臺痛哭先生確然為有宋一代完人雖紀載傳訛其  
不得以沒先生之高節明甚又考襄水無琵琶亭宋史德  
祐元年呂師夔以江州叛降元設宴庾公樓則先生入席  
賦詩坐客皆泣者當在白樂天賦詩處即諸書之流傳失  
實可知矣康熙丁亥七月十有五日  
雨山舊史後學陳大章記

蘄水縣

程居字隱谷咸淳三年授漢陽簿有惠政遷迪功郎由漢陽徙

蘄占籍查山之東迄今子孫稱盛

麻城縣



陳慥字季常眉州青神人太常少卿希亮子少時使酒好劍嘗與蘇軾遊眉之西山馬上論用兵及古今成敗自謂一世豪傑晚棄田宅遜於光黃閼之岐亭菴居蔬食徒步往來山中妻子奴婢皆有自得之意人見其所著帽方屋而高因謂之方山子及蘇軾謫黃州過岐亭始知為慥云

李臺卿字明仲廬州人貌陋而性介博學彊記所著史學考正同異多所發明知天文律歷千載之日可坐數也蘇軾謫黃州臺卿為麻邑主簿始識之後罷官歸卒

蘄州

蒲遠猶字仲俞成都人慶曆進士官閩清令到官踰年病腳氣乞歸尋醫過齊安任師中使館諸臨皋亭不期月孫叔康昌

齡在蘄春以舟迎之遂家焉

詳金石蒲遠猶墓誌銘

朱服字行中烏程人熙寧進士知廬州值歲饑便宜賑濟全活

甚眾坐與蘇軾遊貶海州團練使蘄州安置改興國軍卒

劉摯字莘老東光人累官右僕射辨白邪正紹聖初為羣小所

惡貶光祿卿蘄州居住將行語諸子曰上用章惇吾且得罪

若惇顧國事不遷怒百姓但責吾曹死無所恨正慮意在報

復法令益峻奈天下何憂形於色無一言及遷謫意

孫傅字伯野海州人仕中書舍人宣和末高麗入貢使者所過

煩費擾民傅言索民力以妨農功於中國無絲毫之益宰相

謂其辭意同蘇軾熙寧中所奏貶蘄州安置

廣濟縣



王濟開國元勳審琦十世孫封宗翊郎高宗渡江護蹕南來保

障江黃任蘄州刺史後寓居廣濟

文天禎廬陵人天祥兄寶祐開舉於鄉署廣濟教諭天祥死棄

官隱居廣濟五里橋東迄今家世儒業未艾萬姓統譜

黃梅縣

陳宗達字世顯江州義門陳伯宣之後兄弟五人達居第三康

定初以乏食來家黃梅世篤孝友

胡文政江州人建炎中北兵至其父瑞以良家子從軍兄弟六

人俱赴敵死文政收兵還江州過黃梅蔡山江心寺遂家焉

岳震忠武王飛第四子飛討李成駐兵黃梅詔進屯洪州飛以

士卒非震莫可彈壓因留震黃梅及飛以誣死震易姓匿大

河開弟霆聞震所在亦潛往依焉遂改鄂姓孝宗時錄徙嶺南雲雷支裔而此派不及其後分爲十三戶仍復岳姓家有忠武遺鈕一面有警輒自鳴云

元

黃岡縣

蔣彥忠南昌人勸課蘄黃元末兵起隱居黃岡庶安鄉講學授

徒因家焉

麻城縣

喻千祿江西人黃州刺史勤政愛民工吟詠尤精陰陽律歷諸

書與弟百祿卜居麻城有墓在三角湖上

蘄州



蔡相字鈍夫原籍閩中建陽西山四世孫也延祐二年舉進士授衡陽令多惠政陞衡州守致仕歸路經蘄陽西河驛見山川秀杰遂家焉晚號西河隱者

顧士徵字季貞元平江路崑山縣人阿瑛第七子也元統閒進士至正末參江州總管李黼幕時黼總管江州兼攝蘄州徐壽輝亂兩地俱陷賊士徵走詣卜顏帖木兒請兵復江州進復蘄州以功遙授蘄州路總管固辭明初隱居蘄之鈇姆潭自稱顧七官人年八十卒

黃梅縣

張允中鄱陽人元末以進士任戶部主事管九江稅廠因稅額不足降黃梅稅課司尋落職因家於梅

洪備饒州人忠宣公皓之裔元末授江州路建昌令再授廣州路清遠令不赴過江訪舊經蘄之黃梅悅其山水環秀買田築室於東山子孫世家焉

明

黃岡縣

劉簡字孔章江西臨川人明初任黃州知府政簡刑清建置書院士林賴之靖難兵起棄官寓居赤壁下旋徙東苕鄉服官十餘年惟留書數篋而已後裔家於黃人稱所居為留書灣周浩字季深四川人正統閒任黃州同知視民如子遷石阡知府致仕後附籍黃岡孫瓚舉人為偃師知縣

陳世昌江西舉人官武昌同知有善政解組後士民挽車留之



遂家於黃廷瓚仕愨即其子孫也

蘄水縣

范承吉其先姑熟人學士常之後洪武初徙居蘄之士門少孤  
廬母墓三年一日之野獲遺金數百守之以還遺者有司以  
孝義旌其門其子後遷黃岡之魚博村

胡之驥字伯良蘇州人以詩名萬曆初與蘄之故懷慶守朱期  
至善因家焉期至卒驥為序遺稿行世晚著詩說紀事數種

麻城縣

趙乾歸安人元趙孟頫之裔洪武初知麻城縣後寓居於縣西  
之牛棚山麓子孫家焉

蔡毅中光山人萬曆中進士授檢討以上言礦稅事忤大學士

沈一貫計典鑄秩起為麻城丞歷禮部侍郎以疏救楊漣忤

魏忠賢罷歸明史列傳

黃安縣

焦竑字弱侯金陵人耿定向門人定向督學江南竑執經問道  
後入詞林訪師過安寓天窩書院與溫陵李贄及騷人馬逢  
暘呂四峯何心隱輩同遊處凡所題詠遺墨尙有存者

呂四峯失其名福建諸生有文武才應試日值海賊至當事啓  
院出之四峯拔檣桿並掀舉甃岸石擊賊舟應手斃碎賊遜  
仍入闈終試師事江西梁汝元一作元唯謹來楚主黃安吳氏  
庭有老檜蠹孔九四峯手弓注矢次第畢貫又於壁閒大書

所為春日郊行詩淋漓飛動聞汝元死乃去



殷海鶴孝感人明末亂以妻子僮僕數口來居邑西之岐峯山變姓名曰江夏陳生訓蒙自給酒後吟詠極苦一日不知所往其壁間遺句云閉戶不聞巖虎嘯披衣常待燭龍明至今人呼其址為陳先生廬云

羅田縣

蔣翹之廬陵人掌教羅田因隸籍焉工吟詠凡山水之勝多經游覽

蘄州

壽章陳遜俱吳人羅啟蜀人以仕荆藩占籍於蘄章子儒舉進士見孝友傳遜子灝本府教授啟子志觀愿慤工詩

廣濟縣

魏良輔字師召新建人以進士歷江防道僉事駐蘄州陞山東左布政致仕因州民見思遂與弟良儒家廣濟鄭公塔側良儒與從兄弟良弼良器良政同事王守仁後俱成進士良儒以明經老

張復字子遠休甯人聞黃梅瞿九思講學龍坪執贄就弟子列值九思被誣子甲上書救父復左右之得直罷歸嘗曰學以治心也心念穢雜如野馬亂絲僅鞏悅夸人乎製大鞭懸座右每妄念起輒自痛鞭如是者二十年著作宏麗古雋有黃河圖考行於世

案復又載黃梅僑寓志

黃梅縣

瞿大成其先合肥人祖通官右都督父能佐高帝以開國功官



大都督建文中副李景隆將兵禦燕戰白溝河敗績能及長  
子大芳俱死季子大成逃之黃梅遂家焉後補戍籍從征有  
功授都指揮得世券以奉通祀七傳至廣平知府晟生九思  
楊哲順天人洪武進士任湖廣分守副使弊絕風清吏胥不敢  
仰視入籍黃梅離城二十里黃花港建有副使坊

國朝

黃岡縣

補帽匠不知何許人無家室居止嘗擔補帽具往來黃州團風  
閒以所得值市米取擔頭小鐺作炊或煎水爲茗飲晚乃舉  
襆被投逆旅攜書數帙琴一張時讀書亦閒爲琴操問其姓  
名漫云姓何字白雲後徙居蘄水何廟鋪卒葬其地蘄水徐

子芳爲作何白雲傳

案補帽匠又載  
蘄水流寓志

梅士棟字敬亭宣城人尚於黃性極清潔每至村市無絃誦聲  
卽迂途避之曰俗塵汗人也能詩善書尤精繪事名士多與  
之游訓導馬正塾頗得其筆意

冷絃玉號芝巖山東膠州進士官安陸同知緣事罷主講河東  
書院凡十餘年引掖後進多所成就

蘄水縣

李恕字相如肇慶人寓巴江閒作書畫人無知者適參政李爲  
霖於行館見其畫曰此吾友筆也亟索之邑令訪求輿致執  
手流涕留連數日始別恕能酒善琴尤長於詩所著鶴歸堂  
集識者評其爲恕誹不亂之音卒後邑人咸稱之曰十潭先



生

麻城縣

吳與泌號亦白閩人或曰明季顯宦罷官流寓麻城與曹允昌  
魯晟輩相友善博學工詩文所傳有秋崖逸老傳

案秋崖魯晟別號也

廣濟縣

石山輝字韞玉浙江會稽人乾隆間主講滄浪書院每春秋必  
設饌奠寇山人墓居數年病卒門生故入以其所遺貲殮葬

畢四嶺山人墓側

桑

黃州府志卷之二十五終



